

兩浙輶軒續錄

兩浙輶軒續錄卷三十五目

吳安業 錢廷薰 徐開業 楊宇凝 盛時霖

鄭鳳鏘 王方照 葉金臚 姚燮 潘恭祺

王樹棨 陸和鈞 胡清江 唐寅炳 梅冬魁

張士寬 張積梓 沈垚 馮鎧 汪錢

孫光裕 汪震 嚴适 查元鼎 汪澍

陸擷湘 何岳齡 吳文杰 陳光庭 蔣世鏞

張延棻 李恭浚 蕭瑾 張飛霞 許乃釗

金濂 陳墉 任荃 姜申璠 陳金鑑

兆熊 馮嗣香 胡琮 鄭煜 查冬榮

王鏞 張士鵠 周程 周調梅 鍾瑤

恒泰 徐鎬 朱元呂 俞敬佑 王燮堂

章 溥 李文賁 徐槐廷 黃變清 李日熾

屠繼善 呂燮煌 陳毓秀 王吉人 馮貞祐

文 慶 張鳳翼 王力田 朱時謙 吳鳳徵

馮全均 杜葆恬 馬知良 鄭樹樞 張之杰

鄭依仁 樓作繩 周慶樞

兩浙輶軒續錄卷三十五

督學使者潘衍桐訂

吳安業

原名樹杞榜名樽字杖仙錢塘人道光甲午舉人官內閣中書著小斜川室詩

王麟書傳畧杖仙事母誠孝終身不離好博覽工書法酷似其祖中年喪偶不娶奉母外專以醫學濟人製膏方二十餘種遠近就醫者輒應手愈葺自古外治諸法分門別類名理綸駢文刊布傳世盛行海內光緒癸未重游泮水丙戌卒年八十有九

重脩清暉書院落成兼示同學諸子

國家立學校首善自京都更設諸書院造就實多途

京師有金臺書院

武安近畿輔三府稱上腴此館創前明實始闢榛蕪

國朝始定鼎士氣初未蘇徐公守是邦下車步躊躇慨然節浮靡力任大廈扶前年水暴漲淹沒并田廬楊侯倡捐俸經營復如初拓地於其旁大起照城隅中堂高數仞講學聚生徒東閣奉先師絃誦之所居賓位在西偏嘉會集簪裾後楹

以燕息容榻亦有餘其南曰蓮亭面郭環芙蓉花香月上時
清絕如西湖其北皆水田無稻只葭蘆秋風亂鳬雁飛雪成
畫圖邯山外盤鬱潞水內涵濡地靈所鍾毓髦俊於此儲太
守衡才來翩翩擁旌旗諸生束冠帶執經左右趨有館人三
四應門職埽除兼復給役使亦以治庖廚山長豈不尊道重
稱師儒於今定誰能所愧多虛譽嗟予本下士此來爲貧驅
謬膺太守聘只可老友呼諸子勿師我勉勉志力劬毋負太
守意斯文足自娛暮春有佳日和風暢以舒此亦可游樂何
必魯沂雩

紀浙事二首

句踐城頭動鼓鼙避兵聞說走相攜爭思杜甫出蘆子不敢
梁鴻棲會稽閭巷喧騰常過馬村墟冷落不聞雞故鄉回首

堪流涕惟有驚鳥繞樹嘯

六千盡化慘何如猿鶴蟲沙只劫餘五丈落星空夜帳二嶠
收骨滿荒墟卽防狡兔多營窟尙恐狂鯨又徙居寄語曹娥
衣帶水駐兵相守莫相疏

海風行

時間鎮
海之警

黃雲壓城天色惡海風東來折大木鷓鴣驚避燕雀藏怪鳥
啞啞飛上屋羽書絡繹多傳聞心知譎言慮其真南來消息
不敢問眼望故鄉愁殺人

錢廷薰

原名銜字品階號秋峴仁和人道光甲午
舉人官會稽教諭候選知府著峴園詩草

杭郡詩三輯秋峴宏才卓犖明敏過人少時習算術復
究心天文輿地奇門兵家諸書旁及醫卜靡不通曉辛
卯以優行貢成均旋舉於鄉里中義舉多藉其力

和姚梅伯

變大風坐獨輪車踰東平山抵舊縣道中作

逆風吹沙沙翻波綫路屈曲如黃河咫尺人馬不相見高輪
大石陵欹硤黃埃濛濛落細粉非霧非霰誰爲搓忽然迴颺
壓天半白日到地青山多有如游龍戲大海矯首奮爪紛攫
拏一峯最高出雲鶴俯視列壑猶羣鵝崖崩磴仄不可度中
閒橫起雙盤陀跂行縮若蟻緣磨石紋齒齒皆旋螺雲埋窈
洞人迹絕無乃萬古封煙蘿奇哉姚子鑿幽險隻輪犂确千
山過目光炯炯面黧黑聳肩踞坐聲吟哦自言傑句塞胸臆
昔所未見今蒐羅窮形盡相山鬼泣我亦摹寫歌長歌詩成
夢覺月西墮御者告我來東阿

峴湖雜詩

鎮日焚香不卷簾南樓坐對雨纖纖晚風收拾雲頭去一角
春山到畫檐

門對南山金鼓洞道人已去鶴還飛峯腰斷處寒煙鎖清磬
一聲搖翠微

乍晴天氣鷓鴣啼與客攜筇過小溪滿地秋花嬌欲笑夕陽
人影過橋西

一鐙明滅夢初醒枕畔寒蛩徹夜鳴竹院微風荷院雨五更
相約作秋聲

徐開業

原名兆庠字晴江海甯人道光甲午舉人覺羅官學教習著賦兩書堂詩草

錢泰吉曰晴江才名與陳棻卿俞震軒相伯仲醇謹和厚亦相似得舉後留京師數年儀徵相國延課其孫時助編校戊戌下第南歸逾年卒

胡忠簡公遺像硯歌呂幼心司馬

榮屬賦

臣心如石堅臣貌如石古繪像琢雲腴品壓端溪譜緬維忠
簡公亮直恆自許愧立小朝廷肯與長腳伍勉裁通問書朵

殿然蓮炬鳳珠縵金牋煌煌代天語

見公玉音問答

豈知鐵石腸易

觸權姦怒和議折朝端衡州甘謫處茲硯歷行裝隨身呼爾

汝不遇馬司空誰貌髯吏部

公多髯人呼爲髯吏部見二老堂詩話

歷代愼弄

藏愛惜踰黃圃維公起廬陵簪筆登樞府同里得文山後先

堪接武勤王敗空坑有石天難補吁嗟玉帶生流落知何所

何如片石完不受塵霾侮物色歸名儒千秋得所主司馬雅

好古對之色飛舞作歌踵柴墟寶物快先覩覩面生古懽明

窗日摩撫獨念范左司上書爲親阻

甘露園短書公所上思陵封事爲范左司璿所

作范擬上公慮其親老禍且不測乃改以己意上之

會須寫其真與公作伴侶正氣互

鬱蟠墨沼虹光吐論值抵千金諫疏同珍貯

楊宇凝

字雨泉餘杭人

杭郡詩三輯雨泉和平篤實沈文忠公每出視學必延之校藝所贈古意云堅節永相守豈爲霜雪移可以見

其交誼矣後從張文毅公之江右節署
及皖南軍幕多所贊助非無本之學

客氏刺

外有魏璫內客氏日近小人與女子黨援盤踞君贅疣可憐
社稷輕於紙哀哉仕宦至公卿功名半藉乳嫗成妾容求媚
蛾眉側往來一紙驕人榮朝廷大事悉倒置九邊羽檄不如
刺刺留適增後人悲當日權傾認三字

擬瞿宗吉詠物詩

午夢方回罷酒樽茶鐺小煮月團溫兩環試辨螭頭繞初沸
宜聽蟹眼翻香熱金鑪分柏火灰霏鐵箸坐松軒瓷甌石鉢
休相擬銅綠斑斑認古痕

煮茶鐺

布置明窗恰最宜金猊熬後裊煙遲佛前曾約山僧課月下
頻勞美女移好與烏皮同愛惜不教鵲尾暫分離撥灰對坐

深宵候忘卻花陰一局碁

燒香棹

盛時霖

原名鈞字方仲號犀林秀水人道光甲午舉人舉孝廉方正官永康教諭著誠意齋詩集

家傳畧先生性方嚴以品學自勵大挑授於潛訓導咸豐紀元與平湖顧廣譽同舉孝廉方正著有禹貢纂要

卷一

春夜永康學署偶成

倚壁一鐙昏陳編手厭繙醉餘殘夢續春漸散裘溫聒耳憎

宵柝關心盼早暎鄉書經月斷寂寞與誰論

鄭鳳鏘

字拙言桐鄉人道光甲午舉人官開化教諭

許仁杰曰若授開化教諭訓士先器識後文藝崖岸自立親炙者皆肅然所居新塍鎮掌故無稽乃創爲瑣志十四卷蔚然可觀

署齋春初雪霽程紫荷二尹

泰新

以詩乞梅作此答和

託居山僻地岑寂不知春村郭游都倦園林迹半陳所期來

舊雨相與話良辰庭有梅花放衙齋不算貧

王方照

字意山鄞人道光甲午舉人

題煙嶼樓詩集

玉臺新稿壓詞壇筆走雷霆舌湧瀾餘事作詩揮灑易文言
道俗雅馴難不名一體何唐宋獨有千秋豈杜韓惆悵交遊
逾廿載雲龍相逐愧郊寒

葉金臚

字鴻卿慈谿人道光甲午舉人著碧天唳鶴稿

姜家渡

入海潮趨北衝波櫓指西日高煙樹迴風輭浪花低打麥聲
初起征帆影不齊旋驚農事亟布穀葦間唳

長溪嶺

迢遞入梅林平麓境猶曠石梁通徑幽風磴激泉爽沿溪轉

深處楸箒何莽蒼忽睇前峯高覲面堵屏障輿夫奮疲力盤
屈踏雲上躡虛身倒懸緣峻首隨仰一步一揚簸岑巒皆滉
漾介焉凌絕頂孤亭帆相向天風度鐘聲紺宇在遙嶂息肩
悟化機觸景會幽想塵擾如何蠲跨鸞踞仙掌

姚

燮

字梅伯號復莊鎮海人道光甲午舉人著復莊詩問三十四卷

董沛撰墓表先生經史百具異稟五歲能賦鑑花詩稍長讀
書十行並下自經史百家以逮道藏釋典靡不周覽公
車北上都中士大夫及海內名輩爭相延納交日益廣
才日益肆著述日大益多已梓者若復莊詩問駢體文推
疏影樓詞玉樞經筵未梓者若胡氏禹貢校補夏小正
求是漢書日札宅山圖經詞學標準今樂攷證蛟川詩
繫疏影樓續詞苦海航樂府繭緝錄息
游園雜纂諸書都二百餘卷傳人也
瀛洲筆談梅伯詩骨雄健文筆清新尤精繪事在日下
譜香山願退紅衫樂府優伶爭演習之名重一時詩如
南極雲低三輔夕西山日落五湖秋去浪隨風爭夕勢
孤舟有客動勞心驛背亂船迎柝下馬頭殘夢帶霜醒
當風帆溼猶疑雨入晚天喧漸減衣亂煙掠樹遙青碎
晚日當塵大赤浮諸句如食洞庭柑楓亭荔支別有俊

味

寄心盒詩話向讀姚孝廉疏影樓詞以爲樊榭復生許
君海秋最稱其古今樂府有少陵之遺近聞注參同契
尤深于道藏

湯鵬曰梅伯自蓮辛壬閒海夷之亂出入干戈備嘗艱
苦空山拾橡歌嘯傷懷旋磨危疾幾殆時著蘭枻錄一
書縷述事故信而有徵其爲詩也一變爲蒼涼抑塞逼
近少陵甲辰計偕來都讀其近編感焉生咽直令人擊
碎唾壺才士之窮乃一至於此
斯乎然君文以是益工矣
楊鑄曰梅伯詩如仙人掌樹奇花亂飛神龍
吐珠明月欲語當與紫峴仲則並峙千古
朱綬曰具負山涵海之才運抗古礪今
之氣非蟲響蜩鳴之輩所能幾其萬一
徐榮曰梅伯詩雲海千變月輪孤印乍觀
之令人目瞪舌橋靜對移時彌覺其永

王淑姑詩

月在井中井水明匪井水之明姑之心

今日爲王氏姑明日爲李家婦薦蘿繫喬枝同心誓相守

金環雙歲鞋母欲奪之金環不可斷姑心不可轉
金環可斷井水可濁姑心不可轉姑身不可辱
母知有姑姑知有夫鴛鴦鍛其羽安能傍鷗語
生不同室死或同穴井水之清金環之貞

石門

霸業三吳盡金鵝水尙趨荒晉懸驛柳飢馬齧城蕪西蕩屯
營撤東溟去烏孤風潮忽催夕寒碧颯煙蒲

迎大官

江南一榜飛輕標偵使來傳大官到屬僚祇駕開驛門從馬
如雲肅囂叫樓船八字衝煙道十二舳舻兩行導平頭奴子
影絳纓巨字官銜繡黃纛手版答刺雜行卷腰鼓夔隆促鳴
礮大官升衙來珊冠豸服鞞重臺鞭聲呵叱驕輿僮大官上

轎去風旌日蓋錯森布手戟腰弓六營護大官何所居巍巍
邸宅凌上都鐙屏桃李千花敷爛然金綵生庭鋪大官何所
食九江之豚洞庭鯽縱橫方丈高一尺奇氣芬晔盎春液大
官喜怒不可憑明日大官還弗行

雪交亭故址弔張閣部鯢淵先生

軍藩故巷有悲風一綫城厓棘路通止水在心天亦鑒環山
爲國月常中冬青蜀魄愁朱鳥晚翠南溟掛白虹補怛遺墳
吾昔拜梔花如雪耀澄空

惜湘奴

已丑秋余得佳竹製爲簫字曰湘奴十
餘年來嘗左右焉忽自裂詩以惜之

湘奴兮湘奴爾旣不叶清廟明堂之疏瑟復不爲王門豪座
之濫竽從我十年牢愁抑鬱寄爾聲嗚嗚滄江秋高明月孤
蓮洋一簫飄瀛壺或則下三十六陂泛七澤遊五湖以爾作

天風海濤之引若有金支翠葆冰夷龍伯跳擲來嬉娛胡馬
夜馳河冰如鐵燕關朔風飛大雪以爾作伉儷激楚之音高
如胡笳下如威箠能使當筵壯士冠纓影影仰面酣歌以手
擊節破愁結維揚闔門多酒樓美人紅雪樓上頭春水爲曲
珠爲喉引爾以清商子夜之別調但覺如斷如續低徊宛轉
一聲一息相綢繆湘奴兮湘奴爾豈以知音之人不易得將
投空山斂爾之聲屏爾息弄玉不語湘娥愁白鳳青鸞折其
翼寒蛩兮唧唧鳴雁兮離離清露滴篠風吹桐暮聞擊柝朝
聽鐘繁聲雜籟相彷彿吾欲呼吸而宣洩之誰爲從龍門昌
黎青蓮白石難復作若有紆迴不可告人之意吞吐在嚮嚬
爾今已矣安所託湘奴兮湘奴以爾一尺八寸三分之竹於
我牢愁抑鬱十年寄爾聲嗚嗚我之待爾亦不辱但未挈爾

方壺圓嶠蓬萊巔一奏翺風之吟而歌白雲曲

諸將五章

拱衛

神畿海鏡清烽煙不到慕容城敢來內地窺

天府誰遣中官餉虜兵先奪有聲悲梗議庸才無濟苦邀名
高宗遺策煌煌在肯與臣佗結濫盟

密詔傳宣

紫禁謨

宸心憤切盼歸俘

九重豈料移冠帶三院誰爲請劍誅快積勞心焚象齒恨分
籌米換龍珠願還安宅邀天福多少蒼生泣海隅

割地難言尺土輕未聞犬馬解輸誠譴辭敢抗

天王券餒氣先緣節相旌巧索民輸彌

上帑苦搜亡寇衛長城千秋史筆嚴功罪幾見巍勳武斷成
漢極銘詞表伏波四崗歡唱荔枝歌未防磨石潮通壘還使
橫門血濺戈雕落黃蘆悲海雁淒迷白日走江鯨羯胡早懾
中單戰須檄司徒守汴河

由來一令繫安危太息無良縱詭隨入弊詳明公論在萬年
經畧盡臣知須防閒隙供西突莫聽羈縻老北師自有嘉禾
徵

國瑞荒山靈藥漫居奇

飲試劍閣醉後調主人吳國學

羹堯

大澤龍蛇息戰爭蟻螻如雨掃薨薨最高簾幕初停酒落日
蒼黃樹滿城

季子胸懷礪礪成人閒萬事不糾縈風雷抱得三天券獨與
鎖鄧結死盟

圍棋小劫感滄桑醉裏恩仇醒後忘何似刺船窮浩漫蓬壺
風頂看龍驤

登四明幹山絕頂俯眺二百八十峯浩然作歌

三台無根五嶽小天姥兒孫頭白早神仙亦是蕭寥駒隨代
隨時作塵埽我能到此甯非仙俯首四顧無人閒人閒卻在
白雲下自別吾後當千年白雲在下天在上雲面青嵐日摩
盪西奔萬牛南驅羊北迤驚蛇東走浪青光盡處變煙采不
是山嵐是滄海海煙捲入山嵐中傾刻滄桑百回改仰首不
見鵬鳥飛雲隙過影如蟲微日輪懸臂玉槃大足跟愁雨方
霏霏愁雨秋聲日春色梧落桃開一雲隔孤心已了萬劫殊

寸掌全收入挺窄白雲漸低山漸高掌影反覆心根牢亂山
但如亂墳積雲氣都爲水氣飄我方有住究何住陵陽容成
不相遇茫茫大千蟪蛄身再死重生一回步吁嗟乎死生豈
爲吾身哀亦非以此哀後來塊然頑石今未開焉知中有金
銀臺焉知上古廣成子至今姣好猶童孩不如撒手返塵世
盡吾所事全吾歸形神有滅名與灰除此眼中海水覆作堂
劫杯與此二百八十一萬三千餘丈之峯一一皆崩隕

題葉潤臣詩集

自古奇傑士多生江漢閒置君在此日轉覺勢孤孱對客休
論劍逃禪且閉關竭來蘭畝上荆杞未全刪

五月梅雨溽昔別在京畿君馬太行去吾帆越海歸關山兵
忽隔信息雁同稀不信復茲遇相驚轉自疑

客身憐病困懶造故人廬過我相慰藉牽衣各歎吁無端千
緒引翻覺一辭無坐且眇空闊天雲同鬱紆

皎皎晚山雪閒閒春海雲乾坤與高潔相對每思君樸至情
忘飾心空物可羣但援豪邁例斯世總紛紛

畢竟才華重斯人已可哀眼中同輩少吾子慎將來古史無
文苑名山有劫灰試看神駿骨埋沒幾蒿萊

潘恭祺

榜名世英字馥山山陰人道光甲午舉人官遂安教諭

徐辰告曰君豪邁嗜酒隨父遊閩中始折節下帷文譽
噪都下有十載秋風文字淚一江春水別離情之句爲
誦時傳

送清晚兄之官江右

命宮磨竭坐中年鐵硯原來是石田留得一經詒子弟換將
雙鳥學神仙落霞秋水登高閣鶴嶺鸞岡訪洞天如此湖山

真不負儘教吟眺入詩篇

王樹榮

字簫生會稽人
道光甲午舉人

題姚履堂遺蹟

開卷珠璣燦數行居然勁氣帶風霜
登場未有山河感下筆先爭日月光
此日鯨波寒委骨當時蟾窟夜分香
飛魚埽兔渾閒事留與人閒墨寶藏

陸和鈞

字菊生蕭山人
道光甲午舉人

和同人開門七件

錄五

眞箇青山留得無斧柯不爛任樵蘇
烹茶夜雨和煙溼煥酒秋風帶葉枯
勞未息肩嗟命蹇瘦惟臍骨笑詩癯
閒門臨水知誰叩手把長鑱問故吾

柴

年來甌底每生塵欲乞無書況指困
儘許青精餐粒粒誰憐

紅朽積陳陳珠如可化何嫌幻沙果能量豈害貧料敵幾經
山谷聚眼前勝算孰稱神

米

滿注蘭膏潤一篝餘光底用壁間偷幾經在髮甘爲澤只恐
煎心但解愁仗得隙明由醞釀怪將百沸付泡漚憑教夜讀
尋書味何必殷勤秉燭遊

油

曾將食譜訂吾師得失先參下箸時遠責蒟方成口實窮搜
蟻穴爲膏脂不遺糟粕精華出別擅酸鹹朽腐奇我欲草元
誰問字憑他覆瓿不須辭

醬

不關梅子亦留酸風味儒冠久自安乞少微生知蠶破浸無
孟德笑瓶乾忽令濡首成詩苦別有居心療妬難我羨醯雞
忘歲月壺中小隱甚閒寬

醋

落葉

最是西風最怕聽
沉兼暮雨共飄零
眼看易下攀條淚
手植空翻種樹經
短策尋詩驢偃蹇
孤衾破夢蝶伶仃
閒階記得槐黃候
嫩綠濃青蔭一庭

明知轉眼卽春風
衰颯繁華一例同
縱使不凋成竹柏
那堪浪迹等萍蓬
蠹穿枉校殘書黑
蟲蝕猶留牘字紅
妬煞幾枝庭畔草
頻年霜信準飛鴻

寒螿唧唧一堆鳴
斷蘚殘苔理不清
是處冷偎虛鹿夢
曾經飽食憶蠶聲
園林煥酒難成醉
溝水題詩孰解情
獨有飄搖無定所
夕陽零亂暮雲平

破帽中宵獨倚檐
打頭撲索警霜嚴
從教燥溼分鑪底
一樣丹黃亂筆尖
桐樹原知秋早晚
菜根久識味酸甜
輞川莫訝芭蕉脆
畫裏猶能帶雪拈

寓庭植一桑百餘年物也北俗鮮蠶桑枝雖茂無過問者忽吾友季仁遣僕攜筐叩門求葉遂令恣採因爲桑誌幸

吾鄉蓺桑田培護若五穀飢蠶所急需寶貴異凡木桑土著禹貢條桑歌邠俗豈有牆下桑棄置等野竹都門寓庭中一樹高出屋東風吹柔枝濃葉自沃若初青及黃隕例隨羣卉落幽都無蠶織誰肯稍寓目徒辜有用材年與一年逐非地亦非時安分且守樸但羸結甚甘以供鳩鵲啄豈知抱異質終不瀦溝瀆我友家育蠶提筐忽遣僕就樹恣所采不慮枝幹禿惜無斜倚梯出手難縱欲采采亦盈筐叢叢滿堆綠桑也應自笑時運有往復自分枯槁終微才竟被錄

胡清江

字畫漁號薇史餘姚人道光甲午舉人官陝西耀州知州

胡德輝曰先生官耀州創范文正書院以振文教革陋規簡隸訟時鄂鄂不靖豫飭團練大旱步禱甘澍響應

舟過冶山灣

疎雨過江城孤帆趁晚行斷雲初月出新水亂潮生漁艇歸村急禪鐙倚樹明睡鷗呼不起蘆雪壓蓬輕

唐寅炳

原名棧又名茂莘字辛齋蘭谿人

縣志寅炳生有至性留心經濟咸豐初兵事日亟寅炳以邑當四衝關繫浙東大局慨然奉檄力任團練籌餉不少懈迨湯溪金華相繼陷寅炳與林廷秀郭灝諸人日夜城守培塿禦書檄乞援比北路民團至北門城陷寅炳死之事

聞贈

知府銜子志韓咸豐乙卯舉人次年秋亦死難

子雲

騎尉子宗翰龔

鄧鍾玉曰先生晚年淡於進取與郭開達諸友以詩酒為樂蓋高雅士也而性秉忠義大節不奪又如此

感懷

彈指年華已白頭勞生乍可賦三休維摩斗室堪禪悅司馬

長安久倦遊妄念錯原將鐵鑄壯心磨已似銅柔昨非未必
今皆是眞箇無人可說愁

蟻鬪蠻爭處世難逃禪欲老坐蒲團一生失著殘棋在萬事
休心破甑看北海酒樽猶繼綫東山絲竹已闌珊頭顱攬鏡
憐如許孤負堂堂歲月寬

泡影形骸莫認真登場傀儡枉勞辛閉門性僻難諧俗從井
情癡誤救人咄咄竟成千古恨悠悠已送百年身虛名畫餅
終何用呼馬呼牛兩不嗔

學書學劍總無能睥睨千秋氣漫矜揮手黃金擲虛牝傷心
白壁污蒼蠅老懷愁祇澆醇酒世路危眞履薄冰安得天台
攜笠去茅庵松月伴高僧

闕題

刪盡香奩綺語工酒杯孤負壯心雄
畫橋楊柳秋將老紙帳梅花夢本空
險到懸崖愁勒馬印留殘雪笑飛鴻
十年身世支離甚畢竟狂名誤次公

遊山寺詩

夕陽紅半山落葉滿幽徑清泉浥巖竇
小坐淪香茗年深佛殿荒僧少寺門靜
飛鳥入蒼茫歸路炊煙暝

梅冬魁

字夢雲景甯人道光甲午武舉人官溫州千總

偶成

十載東甌宦迹纏幾人鴻爪記前緣
老松夭矯非時物叢桂芬芳撲酒筵
坐惜年華增馬齒竟無勳績勒燕然
中川豈是忘歸去多買青山待俸錢

張士寬

字筱華海甯人道光甲午副貢官湖南衡永郴桂道箸知悔堂詩稿

許莊祥曰筱華觀察宰新甯值赭寇竄擾下車簡軍實
晝夜登陴匪以火箭上射面受創屹然不少動時天雨
張蓋顧士卒皆露立乃去蓋由是士氣百倍城圍解大
府敘勞擢知府游升觀察善聽訟平反冤濫所至著政
聲

重陽庵宋理宗酒甕

大好金甌撞將破甕裏醺雞還醉臥一杯一杯復一杯朝廷
雖小酒戶大孝宗攘伐最稱賢再傳迺及嘉熙年桂子荷花
歌歌舞千鍾百榼從流連痛飲不到黃龍府壞卻長城恨乃
祖泥馬金牛迹已陳珠襦玉匣悲無主重陽庵裏敗甕存滄
桑塵劫不堪論摩挲如睹綠螳泛封鈴無復紅泥痕冬青何
處空憑弔穆陵荒草黯斜照妖髡醉酹月支頭糟邱臄骨應
乾笑

新田道中

幾日征程惹客嗔，滯留荒徼意酸辛。
山民枯瘠渾疑鬼，巖樹要遮欲攫人。
薄宦尙虛三徑計，秋風易老百年身。
天涯奔走成何事，贏得蕭蕭白髮新。

割股行爲陳氏兩孝女作

丙午之年閏五月，炎威烈烈土膏竭。
恆暘不雨疫癘興，呼號比戶巫醫謁。
茶陵刺史太邱陳，閩中淑配慈且仁。
不忍天札視斯民，疾痛疴癢等厥身。
焦心勞思夜復晨，一朝撓疾苦吟呻。
朝呻夕吟一何苦，母疾枕縣奈何許。
憂心憊憊各無語，評藥量水兩嬌女。
嬌女吞聲雙淚泣，術窮何處尋盧扁。
夙聞割股病可已，袒臂自試刀與翦。
焚香割肉調羹進，股乎惟母寄汝命。
姊妹同時兩不謀，母病霍然更相慶。
慈雲一朵護湘南，富貴壽考天不吝。
回天更喜甘霖降，消除災沴邀天貺。
我歌

孝女增悲悵向侍母疾殊無狀嗚呼搶地呼天已七年負慙
孝女良可憐

監利舟人蘇某女幼許其鄉陳氏子皆有日矣陳子遘
疾遽夭女聞赴投水死

湛湛大江水斑斑湘竹淚中有奇女子早歲明大義臣不事
二姓女不更二夫一朝名分定身世那得偷生未識郎面死
與郎相見結束赴清流肯作靈均怨不曾食商祿夷齊身殉
商吁嗟脆弱女古賢同心腸水枯石可爛至性永不滅誰題
愍女碑千載闡貞烈

紀事詩十六韻

意外傳消息凶頑聚有徒揭竿起倉卒挺刃變須臾絳帕焚
香會黃巾釀禍俱蝸蠻殊蠢蠢蟻鬪笑區區巫蠱初成釁么

磨竟負嵎養疽原自過稔惡抑何愚擾攘同羶附猖狂到狗
屠姦謀今反噬醜類昔稽誅李沅發新甯縣民初從雷再楷
去至是稱已識寬仁誤因之翦伐需探巢防卵翼除莠淨根
報復陷城株露布行宣捷游魂佇伏辜殺機垂象緯七月間太逋藪殄
萑苻此輩真如鼠餘威莫假狐風聲偏不測霓望慰來蘇願
體

皇慈茂齊湔習染汙道光十九年欽定頒發敬闢嬉游
聖諭廣訓黜異端以崇正學韻文堯舜世耕鑿是良圖

送吳南屏學博還瀏陽任

西風吹不已落葉洞庭多離緒渺難訴客愁當奈何人生重
知己游釣負煙波君家洞庭余家西湖揮手意無盡相思託

浩歌

圍城待援書示僚吏兵民

誰憐斗大此孤城援絕惟憑獨力撙一死尙愁難塞責敢求苟免負平生

懷人詩

交游中外晨星散壇坫東南碩果存聞道懸軍猶健飯閉門

自課半千孫

宋于廷丈

粵中羣盜久如毛風鶴驚傳夢想勞料是圍城烽火裏幾回

光弼覓韉刀

沈紫卿學使時平樂告警君適按部其地

張積梓

字守堂號芝麓晚號芝雲鄧人

縣志積梓幼穎異能文章性好施宗黨請貸靡不應勸同仁堂以恤貧瘡設義學教孤寒子弟子善元學行有

父風

早起

簾外綠陰遮披書眼有花蟲知秋氣早鳥報曙光譁人老能
諧俗官閒勝在家蕭蕭無所事滌慮一甌茶

沈

圭

字敦三號子敦鳥程
人道光甲午優貢

縣志圭工爲駢體文經史子集罔不溯

源討流於三禮最探尤精輿地之學

緝雅堂詩話道咸年間如徐氏松魏氏源龔氏自珍張

氏穆何氏秋禱及子敦先生皆能講西北輿地之學先

生著有元史西北地輿測二卷附蔥嶺南北何攷漳北

山以東釋一卷新疆私議一卷附蔥嶺南北何攷漳北

嶺南諸水攷一卷西域小記一卷落帆樓後集三卷外集

帆樓雜著三卷簡札摭存三卷落帆樓後集三卷外集

七古一章用孫愈愚韻贈家柳橋

雨多川溢水相觸防患誰先改突曲兩淮荆湖災較重飢民
形面皆鳩鵲錦江杭稻足轉輸千里雲帆下夔蜀吾鄉地下
北濱湖南來茗水源天目運道所資有荻塘衝處菑石撻以

竹近日棚民墾山地泥鬆和雨下山腹填塞溝渠患非細人
尤凶悍性不淑下流況又太湖淤菱蘆彌望包山足山源不
蓄湖復淺汎濫將如癰潰肉水盛齧塘橋久圯阻斷行途嗟
蔀屋烏程縣令議修塘淫流奔放防溪谷斂錢富民事豈易
司役惟君見免俗君本儒者洽見聞冥心水利接曾獨勸君
努力重下帷膏澤他年霑草木

馮

鏗

字少蘅錢塘人官
廣東黃岡同知

停雲閣詩話少蘅前南海令西潭
先生哲嗣也少年偶儻兼通詞曲
楊振鎬曰詩輯作仁和人育雋才尤精音律著有夢雨
樓詞草天涯夢傳奇願不解治生業故交逋券雅不責
債爲貧而仕以別駕攝饒平令權潮州
丞頗著循聲年四十遽卒至無以爲斂

登岳陽樓

流水自來往高樓成古今平生勞夢想此日快登臨我欲乘

風去仙兮何處尋相傳有遺蹟一片暮雲沈

汪

錢

字柏年錢塘人官福建巡檢

錢泰吉曝書雜記柏年究心吏治能詩善刻印畫有奇氣

畫竹

昨宵酣夢入瀟湘霧月迷濛煙水荒我欲題詩問修竹可容心地獨清涼

孫光裕

字瀛帆仁和諸生著樹萱草堂詩鈔

丁酉日瀛帆文博學能文中年爲申韓家學暇則恣力于詩才藻豔發傾倒一時佳句如南山古寺題壁云落花滿徑鳥嘯寺斜日半肩僧上樓簾作詩者云花到半開香正好酒經重釀味逾醇尤長于樂府道光辛丑壬寅閒英夷擾浙曾賦從軍詠十章激昂悲壯當時情事描寫曲盡可稱詩史

乍浦戍

塘繞當湖環乍浦浙西重鎮擋門戶都護防城擊枹鼓東指

舟山鬱風雨帆檣出沒無定所健兒橫戈吼如虎氣壓驚濤
吞醜虜一旦沿塘集樓櫓礮火轟天飛猛炬棄甲曳兵擲弓
弩抱頭紛竄虎如鼠官兵旣散賊兵聚官兵爲客賊兵主主
人移居讓客處主人未歸客亦去往不追兮來不拒君不見
乍浦戍昔時重鎮今曠土

朝廷養士三百年後先奔走日禦侮

杉青牖

鴛湖水草黏天碧杉青牖口苔蘚齧牖外屯軍幻塵劫草染
鵝紅水嗚咽乍川失守寇氛邇鶴唳風聲禁不止居民聞警
紛避徙揭竿之徒乘亂起將軍下令誅漢姦殺人如草多株
連甘涼健兒勢洶湧遇敵則怯遇民勇摩厲以須逢狹路爾
來好送頭願去姦民狡黠良民懦姦民漏網良民誅將軍非

嗜殺健兒豈盡誣與其失不經無甯殺不辜縱殺不辜休怨
子芳蘭尙以當門鋤况犯虎威捋虎鬚屍纍纍血濡濡烏鷺
啄肉委路隅亡何有鄉名子虛一邱之貉誰賢愚吁嗟平將
軍令司馬法昨日誅某乙今日戮某甲簿錄雖分明猶慮有
冤脅奈何罹羅維不及呼名鴨點鬼呼名鬼亦愁模糊夜哭
杉青牖

父子兵

朱將軍身許

國子昭南志滅賊父子英雄戰必克所向披靡一當十無端
凶燄偏句章豕突狼奔勢莫當孤軍捨命死強寇礮火叢中
霹靂鬪賊有伏戎我無救矢亡援絕孤軍覆將軍勇烈真超
倫臨危手刃數百人典韋雙戟終戕身躍馬奪屍將軍子父

屍不還陷賊壘父子堂堂力戰死蠶爾逆酋懾威名膽落朱
家父子兵父子兵死猶生父死職子死親子孝子父忠臣君
不見曹娥江上胥潮吼千古英靈同不朽

吳淞潰

翦水水不斷流名名不朽桓桓陳將軍保障吳淞口議撫議
和公獨否慷慨誓師籌戰守與賊相持辰至酉礮擊賊船碎
賊首連挫賊鋒賊奔吼戰勝功多公不有益嚴紀律謹刁斗
更番鏖戰賊屢負虛聲恫喝反閒誘犄角無人督師走孤軍
糧竭動掣肘麾下壯丁病八九枵腹空拳胡可久將軍振袂
大呼病者起但見煙燄蔽空摧壁壘嗚呼志決身殲今已矣
淋漓血濺吳淞水鬼眾聞之驚且喜同聲太息奇男子鬼猶
慕公忠勇惜公死可以人而不如鬼

汪震字曉仙仁和人著桐香館詩存

莊仲方序略曉仙博雅有素藏書數萬卷好金石文字漢甄魏瓦燦然斐几書法晉唐畫仿蘇米非所謂潑墨

度邱壑下筆走龍蛇者耶

吳興竹枝詞

六客堂無六客栖青青階草沒春泥壁閒珍玩前朝鵲那解

中原杜宇嘯六客堂在府署宋張惲守吳興蘇子瞻曹子方劉景文蘇伯過張秉道來後人因以名堂壁閒

有宋高宗畫鵲

鷗波亭俯墨池紋流向蓮華莊畔分銀杏空遺南國恨可曾

歸去續陶君亭與莊皆趙松雪別墅遺址松雪宅舊在甘棠橋植銀杏今尚存

東鄉絲比北鄉強小滿村村出賣忙最苦小姑親手造眼看

人織嫁衣裳湖絲以東鄉為最方音謂好為強小滿見新絲湖俗語

嚴适字子容仁和人候選同知簪香南齋詩存

許湛祥曰于容文酣喜倚聲宗法小長蘆續輯詞綜若干卷惜不永年郭頻伽襲餘叢話有仲宣體弱叔實愁多清氣靈襟迥超凡俗之評詩不多作遺藁散佚文孫曾銓按羅數首亦可寶已

秋海棠

碧紗窗畔睡昏昏鎮日無人自掩門
小院初酣胡蝶夢空山欲冷杜鵑魂
半簾竹影迎風色一斛香脂滴露痕
喚作放翁顛亦得思量排日倒金尊

觀復齋新竹

風枝雨葉影迷離笛几琴牀位置宜
慘綠衣裳渾一色也如末座少年時

查元鼎

字莊舫號小白海甯諸生著蘇紅院詩稿

杭郡詩三輯小白少受知於吳棣華殿撰程春海侍郎李北海詩三輯御咸以大器期之家貧親老橐筆幕游從軍入閩海卒於淡水尚有草草草堂詩鈔六卷稿留臺洋未之見也

度朝天嶺

奇峯拔地起具有朝天勢舉家似劉安都在青雲裏
籃輿迤邐行俯覽心頗悸世途本蕩平猶自防顛躓
何況厯崎嶇失足應尤易置身萬仞岡步步須留意

汪

澍 字一江嘉興人著
古梅溪館詩集

鐙窗瑣話一江詩清和淡遠迥出恆蹊長古如題五千
卷室銅鼓詩及寶劍出匣圖尤見力量五言如煙寒孤
館雨人老百蟲秋七言如詩有人傳差免俗書無錢買
始愁貧客爲夜寒呼酒數天憐春短壓花遲皆可誦也

池上

愛追林下涼卻向池邊步池水靜不波繁星若棋布
憩石一披襟清覽愜吾素桐陰流碧雲荷氣散香霧
忽驚風入林落葉紛無數只疑山雨來不知秋在樹
虛懷欲悟禪靜得自成趣手攜蘿徑月抱琴復歸去

冬夜卽事

半牀疏影寒獨臥梅花月覺來窗竹鳴蕭蕭似聞雪開窗月在樹猶疑殘雪色出門踏月去冷光沁肌骨心知有花處香已滿溪積尋香渡溪橋一鴈凍雲白

管夫人畫竹壁歌

籜龍歲久不肯住怒挾風雷破壁去至今牆下長龍孫卽是當年畫竹處誰其畫竹管夫人勁節凌霜森有神想見胸中有成竹用意似欲規王孫王孫舊此讀書院時移物化滄桑變冬青欲哭尙無人何論夫人以竹諫夫人墨迹久成塵賴有當時石刻存楚客貞魂猶未泯湘妃血淚尙留痕王孫亦曾工畫馬一時夫婦爭風雅可惜穆王八駿圖南來不爲康王寫嗚呼縱寫騰驤千里足未及琅玕一枝玉

陸擷湘

字晚香嘉善人著夢香室詩鈔

閒居

園林寂寂懶開扉靜對流泉洗道機讀罷南華支枕臥落花無數點春衣

何岳齡

字衡山海鹽諸生著漱紅山房詩集

朱錦琮序畧君幼慧家甚貧負米承歡囊筆客諸侯閒咸奉爲上客遭時不造憂憫之心發之于詩寄託遙深合乎風人之旨

山村閒步

修竹不知數寒雞時一鳴獨尋幽徑去閒上暮山行日落郊原秀雲開島嶼明悠然心自遠何事學逃名

吳文杰

字儼雲石門諸生著讀易軒詩鈔

宋咸熙序畧儼雲少穎悟六齡就塾卽能辨四聲兄香竺官粵東儼雲慕羅浮之勝襍被往遊而詩境益進香

竺謂其詩春容嬌雅如宮
柳三眠春鶯初囀不虛也

題畫

深林漠漠幾迴環中有幽人意自閒一面巒光三面水垂楊

青到隔溪山

陳光庭

字魯瞻號東野烏程諸
生著紅雪山房詩草

張士鶴曰東野事母孝母呻吟牀蓐閒躬侍湯藥六載
始終不渝善吟詠與周鴻遠蔣世鏞及士鶴相倡和集
於鵲峙山房有
放情詩酒之樂

秋風

井梧一葉下蒼苔爲報西風動地來漢主飛揚歸沛縣楚臣
詞賦重蘭臺關河有客悲萍梗池館無人共酒杯寥落千年
自搔首殘星孤雁不勝哀

蔣世鏞

字蓮洲歸
安貢生

府志世鏞少以詩名勃勃有英氣不染時下庸沓之習晚治古文宗三蘇

游碧巖次厲樊榭徵君天然圖畫閣韻

四十年來又一登飛鴻泥爪記前曾重尋春夢惟存我久住
名山尚有僧題壁其添新得句攀崖還認舊垂藤從容移步
雲峯頂老去劉郎惜未能

張延綦

字申薌號春舫鄞諸生

董學履傳略延綦從董名問遊名問器重之妻以女以學行為後進師嘗曰為學毋貪得毋銳進家綦貧而潔清自矢嘗遭火鄰人皆遷財賄延綦獨扶其母去不顧他物以是咸稱其孝

六月十五日遊赭山作

半浦自昔多山川北有赭山高插天層層峭壁半奇絕雲峯
石嶺相盤旋廟貌巍巍踞其頂深潭下有龍王泉水旱祈禱
求必應居民報祝年復年城鄉遠近各瞻拜男婦隊隊魚貫

聯澄清天宇河皎潔我來直欲凌層巔到此心目爲一快俯
視下界惟蒼煙千塍綠野平如繡幻江之水鉤若連興酣呼
酒聊一飲醉倒藤石吾欲眠始知位置高且遠便覺擺脫塵
俗緣而況泰岱矗雲表一覽眾山皆渺然爲尋緱嶺吹笙客
不遇爛柯觀棋仙半簾夕照僧舍靜松風水月偕談禪鐘聲
微動促歸屐嘯倚古樹猶遷延

獨坐

兀坐高樓對短檠空階唧唧草蟲鳴狂風倒捲千絲雨迸作
秋窗一夜聲

李恭浚

字宣甫號迂厓鎮海廩生

蛟川續耆舊詩迂厓攻苦勤學嘗患咯血自以養名其
軒所著有養軒未正草養軒風雨錄雖窗瑣語海昌詩
選簇錦集道聽錄諸書道光辛丑館城外當軍壘之衝
見諸士夫所爲抱杞人之憂賦長愁歌以憂憤而卒

蘭渚田亦可種秫黍何當奉母歸春堂介清醕庶免猿鶴嘲
循陔恣容與

泉南拓陸文圭去思碑二裝冊示余題四詩於後

甘井至今傳李錫慈君在昔重張譚千秋但使留文字清節

和神兩不慚

元大德間李師善至順間張紹祖先後令江陰俱有善政

官好從來懷四知國高媲美頌無私硬黃搨本須珍重此是
襄陽墮淚碑

公道人心那復疑江山如此令名垂一言一思難磨滅絕勝
圖形陸浚儀

剔薛曾慕頌德文十年承乏亦勤勤臣心如水民猶監只恐
蓉江廢二勳

張飛霞

字杏亭黃巖諸生著環綠園詩存

八疊道中

翠微環八疊嵐影落千尋山路搖涼蔭人家靜竹陰秋蟬迎
客語野犢渡溪深小飲沽村店斜陽下遠林

許乃釗

字貞恆號信臣晚號邃翁錢塘人

杭郡詩三輯邃翁清門世胄館選後疊掌文柄視學於
粵東嘗刊所注敏果齋兵書七種督撫奏上之得

旨通行咸豐初

命至江南與向忠武會辦軍務尋擢蘇撫會寇勢張甚閩廣
匪徒又煽亂據上海旁縣並失遂落職其後
輾轉兵間屢蹶屢起以疾乞休頗耽禪悅

西溪看蘆花

攬景出西郭溪山相枕藉落葉滿山隈窈窕秋妝卸溪水清
且幽篷窗時激射濛濛水天淨晴雪亂飛下一白眩銀海倒
影澄潭瀉嵐氣暮凝紫人煙亘桑柘芒屨草露單新水出林
罅送客過溪橋襍被臥邨舍回首塵市居安得如此暇月魄

有盈虧人事更代謝蘆花易白頭榮瘁亦云乍及此雙鬢青
歲月天肯借盡日愜勝游不足繼以夜

金

濂

字讓水號樺柏錢塘人道光乙未進士官翰林院庶吉士

杭郡詩續輯讓水家貧不能延師王義亭大令蘭不受脩脯而教之成名弱冠舉于鄉既成進士入詞林未散館而卒年僅三十有六爲人靜默善處家庭之變以孝友稱

趙忠毅公鐵如意歌

逆奄顛倒弄神器錯鑄六州正士棄公欲摧姦不如意得如
公意社稷利尺半精鏐一握珍身圓柄方篆鏤銀誰爲作者
張鼇春五嶽八卦昭星辰二十六字銘辭新我讀斯銘長太
息德陵朝局半荆棘舉朝拱手魏與客上方請劒不可得唾
壺碎擊蟾蜍蝕雞三號兮都堂開指揮曾見三君來四害四
凶陳天階抨擊梟獍除蛇虺黑雲迅掃晴轟雷神寒骨重經

百鍊熟不因人寒不變清堅質並東方硯金剛豈畏妖氛煽
荷戟偏遭代州譴公譴婦豎欲愈張紛紜鉤黨來披猖銀鐙
可使身摧藏披瀝肝膽追左楊是時天傾石難補公幸不死
歸戍所塞月邊笳亦太苦摩挲故物中宵舞珠綴珊瑚盤安足
數嗚呼是器今古希廉而不劓鉤無鑊百回弗折形影依葵
首向日心不違蓋棺宜著老兵衣精芒閃爍冰霜窟繞指難
教卷如髮此卽錚錚忠毅骨太白睽睽光冥冥扶天有力空
千鈞高歌擊筑悲淪放何如慟哭西臺上

陳

墉

字作甫錢塘人道光乙未進士官甘肅肅州知州

鍾駿聲曰作甫以古文名海內出宰隴西垂三十年肅州之變極意綴輯爲上官誣陷遂鬱鬱死著作亦燬

薄宦

薄宦成吾老邊城逼歲除風摧殘燭燼月補夜窗虛病益思

鄉味貧難答友書曠懷聊自遣天地一蘧廬

任荃

字月坡慈谿人道光乙未進士官廣東埔知縣著鴻爪集

曉發湖寮

晴建萬川城石柱字迹猶存

五更馳馬萬川頭煙樹冥濛村路修市沸人聲天半曉渠穿
山脊水橫流六朝陳迹餘華表十里春雲隱戍樓野老自耽
耕鑿味海邊烽火不知愁

和張參戎登厓門

緩帶輕裘上驛臺虎門山外陣雲開側聞

天子憂南服幾見書生飽將材烽火定隨邊月靜詩情長湧
海潮來愧予未有平倭策落日荒江酒一杯

姜申璠

字魯玉號海珊會稽人道光乙未進士官陝西臨潼知縣著蓮峰舊稿新豐吟草從政記各四卷團

練操防紀實江防續略各一卷

丙午試院題林少穆中丞秋色圖

莫道秋容澹秋花獨飽霜羣英瞻老圃如飲魏公香
鏤院寫詩情西風入畫清名場今夜月堪與比光明

留別臨潼士民

語語官民肺腑披拊循愧未徧茅茨吏經蠹剔能知法人似
鷗馴倍繫思賜袴縱歌廉范惠牽舟空說鄧攸慈重來士女
應無恙立馬驪山夕照遲

陳金鑑

字介鏞號蓉臺新昌人道光乙未進士官山西黎城知縣著五馬山樓稿

梁葆仁傳畧金鑑質實端重少孤育於寡嫂家貧挾卷而樵族人嘉其志共成就之年十四始專心勵學以拔貢舉于鄉成進士著有四書說易詩書三禮三傳說周禮諡法解補

讀顏魯公行狀書後

卓哉顏魯公勁節挺唐室河北廿四郡平原政第一到時樓

櫓修黔黎徧撫卹惡氛起范陽飛章上告密四鄰推主盟萬
姓感號泣忽傳三忠首深恐眾心失大言稱非是潛令收藏
畢逆使斬軍門諸將皆股栗蒲身殮衣冠文武哭三日仁深
郭子儀義勳李光弼祿山陷東京害留守尙書李愔中丞盧
奕判官鞏縣尉蔣清等因以三人首來
徇河北脅諸郡降逆使者段子光至初拽入門子光大呼曰
僕射入東京遠近盡降聞河北諸郡不從故令我告之若損
我悔無日矣遂歷指三首各言其人名識其是恐搖人心乃
謬謂諸將曰此三人皆非也命腰斬子光潛藏三首誌其處
稍定縛蒲爲身棺殮發哀致祭殯之城外哭三日舉聲下
淚受文武弔慰左右無不泣涕者自此義合歸者益眾
年諭希烈車單馬一匹不敢宿君言遑復辭老疾握節龍興
寺行年七十七遺書力透紙遺事史載筆我學公書法兼讀
公行述沈吟殷亮言靈氣猶橫溢

懷仁縣放振自曹家莊至第三作村題壁

寒冬奉檄振災黎聽訴今年事慘懷六月飛蝗人晝哭十旬

早魃鬼宵嘯養姑孀婦傷拋子殯母孤兒競賣妻第三作村有劉世希賣妻葬母弟世寶妻方妙年願賣以殯母世希曰爾前年娶婦未得子我子六歲矣應賣我妻為殯遂得身價九緡以五緡市棺四緡市衣未及買地以葬及十月放振至此始知其詳婦已為平定州人所納不及追矣因厚振之詩以誌感

破瓦頽垣房拆盡不堪聞見近輪蹶

得家書知南中旱災感賦

九夏南雲日日紅望穿病眼到秋風書來細說家鄉嘆讀罷

深憐族黨窮地動一方驚老弱六月十三日兩寅新昌城鄉地動市災百貨

困商工六月十九王申新昌城市大火果然歲諺輪逢午人馬羈飢食土同

庚癸今年處處呼耳聾徧值守錢奴紅陳糴閉臧孫玉黎獻

憂描鄭俠圖恒嶽東西愁雁斷大河南北慘魚枯吾鄉好義

由來眾定有仁人愛屋烏

兆 熊字渭飛杭州駐防滿洲正藍旗人諸生著柳洲子集

城西古蹟考謂飛居丁家橋北塊生而穎悟弱冠補弟子員工詞翰負氣節待母孝嘗割股以療母疾賦性淡逸琴書自娛惜
早世遺箸並佚

讀書梅青院

借得參寥榻禪房別有天小詩花裏詠古調月中彈酒苦招
僧醉茶新待客煎幽深塵不到何用羨神仙

馮嗣香

字少峰
錢塘人

題夏伊蘭女史吟紅閣集

瓊樓縹緲構清虛十五年前憶舊居想爲人閒名士少修文
徵到女相如

胡

琮

字季權敬三子仁
和廩生候選訓導

杭郡詩三輯季權生京邸書農學士乞養歸乃隨侍返
里文名噪一時道光壬辰與兄琨同應童子試學使何
文安公拔琨冠仁和軍季權入府庠辛丑歲羅蘿村學
使擢第一食餼時學士掌教崇文正課外益以詞賦卽

以其題課諸子季權昆季之作多附刻敬修堂課鈔
中家學淵源一斑略見辛酉寇至餓死于定鄉山中

桐扣山

臨平湖乍開青蓋洛陽走典午繼當塗玉册侈禪受惟時山
出鼓異事駭耆耆其音啞鐘咽其質獵碣厚豈以應黃鐘而
恥儕瓦缶偉哉張茂先博物才自負陟釐三百番手鈔亦已
久豐城夜觀氣劍氣燭牛斗東來汎禹航神物亦時有桐材
試採取魚狀任剝剖作其鱗之而付彼匠人手鏗然大聲發
餘響振岡阜湖驚鼉窟翻雷詫蒲牢吼如彼豐山鐘自鳴匪
用扣如彼蕤賓鐵忽躍喜逢偶感應出自然此理人信否迄
今千載餘魚爛石未朽呵護乞山靈丁甲永相守摩挲增太
息空山重回首可惜淹雅才戾運遇陽九中台圯樞星砥柱
撼羣醜不如石無言默默緘厥口龍鮓君未嘗聊復澆苦酒

題許君修華藏室詩鈔

百首吟存古錦囊就中人事半滄桑康成家世傳通德丁卯
才名滿洛陽墓草故人同感慨謂稿中唱和陳小雲孫子勤諸君子雪泥陳迹
賸微茫慰君後嗣能繩武共讀楹書手澤長

眞摯情從肺腑宣清詞如對話纏緜家鄉雲樹思歸句驛使
梅花寄遠篇自爾湘靈傳語妙勝他錦瑟鬪詞妍那堪兜率
升天去才及長沙上策年

奉檄閩疆著政聲榕城荔浦紀郵程憑無社鼠姦胥肅懸有
庭魚宦況清五袴謳思留愷澤卅年蹤迹想生平神壇聞說
驂鸞降紫府仙歸石曼卿

英年器已廟堂儲詩在通才只緒餘桑雉深仁思漢吏澤鴻
荒政法周書恩恩墨綬遠初願藉藉瑤章擅美譽止水齋居

遺翰迹琴牀蕭瑟悵何如

湖濱消夏詞

山圍傑閣峙千尋近許繙書惠士林萬柳陰中消夏課松風

涼石鎮池心

中丞許詒經精舍士子至文瀾閣讀祕書

白沙隄畔盡垂楊畫舫能生六月涼令我感懷羊叔子一時

遺愛徧甘棠

白隄楊柳爲富海驛制府撫浙時所補栽制府新捐館

雨添新漲浸城根南去清波入暗門爲愛滿湖跳白點和煙

舟泊相公墩

阮墩亭子將圯近重繕葺

闌干曲曲柳陰遮柳外長隄一道斜一半句留好亭榭滿池

添種白荷花

樓居高近綠天酣戶牖空明盡蔚藍欲把蛾眉比西子劒南

山翠似江南

橫翠樓額爲汪少海明府所書蓋取東坡峨眉橫翠詩意爲名

最愛湖南獨秀峯畫兼詩意出禪宗竹頭儻有餘工暇添葺

山房補萬松

時議淨慈工畢後完葺萬松山房為松光上人退院之所

外湖爭及裏湖幽松徑渾忘觸暑遊擬學喻彌陀說法繙經

同上十三樓

瞿穎山重葺十三樓撰記泐名

須知霽月光風抱別蘊開籠撒網慈一樣雲溪庵畔水清涼

蓮界護生池

梅侶師訪得千金池故碣請大吏重禁清界地設巡舟昔日之梵唱香雲澄潭碧藻復舊觀矣

鄭

煜

字畫人仁和人著執玉堂集

丁申日先生為申兄弟受業師以學行著于鄉與黃邦翁周南卿兩先生連牆比屋龍泓隱君流風餘韻猶及之為文具有家數精音韻之學著韻學音義詳釋百三十卷旁及繪事蘭姿竹韻且入板橋之室里居教授奉九十老母承顏如孺子年十九喪偶以兄有子塋終身不再娶庚申之變以所居在張紗街賊未及至故安然得無恙是冬乃寓書申等日紛紛避亂踴踴家居寇若復來誓以死殉不能泚泚苟活也明年城再陷自縊從子塋婦沈同殉

題汪氏孔耳石

餘花晚筍氣清和小友名僧伴嘯歌莫使山靈叱生客石林
谷下撥煙蘿

盤盤翠蚓十八字歷歷紅羊七百年誰把昆刀割龍耳一編
燕語共流傳

一握雲根四尺強弁山猶帶色青蒼宣和舊恨飄風過不唱
玲瓏花石綱

松聲池館最清幽供養煙嵐又幾秋恍拜一龕長耳佛石頑
如我也低頭

查冬榮

字子珍號辛香海甯諸生著詩禪室詩集

許淮祥曰辛香丈擅詞章家故貧以負米計橐筆出游
元瑜書記名動公卿間有某帥者權傾一時中外側目
慕丈名招入幕府丈不屑苟就使三往卒謝病不赴未
幾帥敗波及幕賓丈倖免人服其識古云良禽擇木丈

之謂也

野眺

水國送新寒蘆花如擘絮柳陰看鷺鷥江雲忽飛去漁翁倦
釣歸寒蟾挂溪樹商聲四野來落葉紛如雨葭蒼又一年伊
人渺何處

登天壇遇雨而歸

昨宵宿王屋今日登天壇金雞三唱玉屏啟乘風道上跨青

鸞清風明月

兩臺名

列左右一析閒雲迷遠岫山中草木龍蛇

護洞裏煙霞猿鶴守紫微宮闕矗丹霄千巖萬壑爭來朝日
精月華射光彩出林水樂同簫韶振衣淩絕頂愛看軒轅鼎
欲與仙人埽落花霓旌羽葆頻相引蒼松如蓋黃河如帶不
聞人聲時聞天籟白衣蒼狗紛紛馳跳珠潑墨爭催詩隔嶺

夕陽來返照樓臺倒影神工奇此身斷作山靈主世亂與誰
商去住遨頭乞得天地泉灑向九州作霖雨

王

鏞

字鹿場嘉興人
著小鹿柴遺稿

蔣浩序略鹿場工于吟
詠氣韻風骨不落凡近

題蔣秋堂丈

錦照

青山有真意白雲無盡時高人守元默靜憩澹無思胸次殊
浩蕩窮達無不宜山中赤松子逍遙以爲期

惜餘春辭

東風吹穠春捲入長門柳柳綠花又飛良辰惜孤負我欲結
繩繫此西飛之白日捫參厯井苦無力又欲揮金買此碧海
之春華金高北斗買不得子規兮子規爲我喚東風兮西來
東風喚不回阿嬌愁顏何時開

張士鵠

字季禽號韻梅烏程諸生著求在我齋詩略

府志士鵠自少工吟詠垂二十年與之游者朱

點蔣世鏞陳光庭周鴻逵陳丙綬並稱許之

周學廉跋略諸作骨韻俱高言及骨肉閒事尤爲懷惻非有真性情未易臻此

題謹庵和尚

顯清

望雲圖

有序

謹庵秀州儒家子父以事成秦中十二歲祝髮明州

天童山二十餘年矣乙酉秋接秦中書父得赦不能

歸時謹庵適自方丈退院遂決計省親行腳經湖州

出圖索詩余墨纒甫脫展其冊不知涕泗之滂流也

憂端齊太華雲氣相糾連骨肉慘生離相去各一天牽衣攔

道哭問爺何處去千重萬重雲中有征人路別爺今廿載音

容竟安在破衲換萊衣禪鐙耿無寐搔首向雲天枯腸擁熱

淚翩翩雲中雁附書天一涯孤兒捧書喜見書如見爺上言

邊庭霜日夜思還家風沙催人老齒落髮亦華孤兒掩書哭
見書不見爺兒在故鄉好爺在異鄉老打包誓相從相從恨
不早嗟彼緇衣流尚思反哺鳥緊我今鮮民何處報春草重
泉非異鄉陟配望已杳吟成擲筆歎悲風起雲表

戴味秋手鈔明人尺牘題後

有序

明葉瞻山侍御

樹聲

世居長興先六世祖母其女孫

也未國變以父喪歸病終于家德情戴君從公後人

假當時往還書札手錄見示凡倪公

元璐

三通史公

可法

二通馬公

世奇

方公

震孺

黃公

道周

楊公

廷麟

吳公

偉業

各一通倪書有言君子定命之學時黃被

逮在途用以寄慰葉氏後人謂爲致侍御者非也

諸君富文翰吾志慕倪黃大節稽年譜千秋重講堂思陵操

已急閤黨燄彌張莫過梅花嶺懷忠更斷腸

介節鄉邦重嘉名志乘稱立朝嗟未久考史已無徵侍御明史無傳

往蹟纒青蘚芳塵展素綾多君仰前哲衰朽不能勝

周程字配文號嶺臺鄧諸生著亦處堂稿

過山村

深樹野人家門前溪水斜綠迷當戶竹紅露隔牆花沙潤蟻
分壘日暄蜂聚衙三朝穀雨後處處煮新茶

周調梅字半樵山陰人著越詠

陶潛宣曰明王埜著越詠其書久佚半樵先生續成越詠兩卷凡三百首仿南宋雜事詩式於詩後別作一行爲題以趙宋前爲限凡府縣志所載習見事屏不錄博采遺稽頗多佚聞足補志乘賀循虞愿去人未遠矣今節錄數章以存其概餘詩皆佚不傳

越詠錄八首

萬金畫像抑何癡凡筆雖妍總覺嫌多謝蘭巖兩夫婦特教

蘭巖雙鶴是夫婦隱此數百年所化見神境記

塵世認仙姿

白足天生好遠游

閉關垂老雪盈頭蒲團還是芒鞋好又看

名山二百秋

宣室志僧惠照遁會稽山佛寺時已百歲又至長安京洛三蜀五嶺追今二百九十年矣

虔修慧業養心靈

嗜寫三藏筆未停妙楷祝融知愛惜不徒

菩薩護遺經

法苑珠林山陰謝敷寫首楞嚴經置白馬寺寺燬于火經僅燒去紙頭界畫文字無所煨失

庾辭題壁尙含糊

謠語分明受命符慙慙江東作三窟金牀

曾臥片時無

十國春秋董昌曰誠言免上金牀我生於卯明年歲旅其次當卽位

風雨龍蛇護瑾瑜

兩番寶氣出泥塗夏書越絕忘編載合補

茅山禮器圖

史記正義孔文詳云宋末會稽修禹廟於土中得五等圭璧百餘枚演繁露紹興十三年間

會稽禹廟前發地得瑤玉四一蒼玉二蒼瑋一圓璧

太息先生老補脣寒溪怨氣死方伸鑑湖不是桐江路莫配

嚴光配季真

方干號補屑先生見唐詩紀事

魂魄應猶戀舊廬數椽合請主人居不須秋菊寒泉薦白藕

新斲紫鰕魚

越中園亭記快閣向爲定心庵陸景鄴改爲祠以祀放翁

未得移家屢渡江溪山留客坐船窗小紅低唱吹簫和一往

情深自度腔

姜白石愛越中山水作徵招詞以寄興

鍾

瑤山本姓王字朗山一字膈山陰人著偶寄草堂詩稿

寄心盒詩話鍾朗山流寓彭城工書畫余客徐時往來莫逆千金亭詩云功成報德千金易路狹求人一飯難

眞傷心人語

送白亭先生之淮

再見知何日離心鳥共飛去留俱是客老大未能歸河畔風霜厲淮南木葉稀天涯同濩落此別更依依

寄王三波都尉

嘉福

年來愁見雁南征故里難歸繫旅情山水笑人猶有態文章
擲地久無聲塵封劍匣龍仍臥風靜弓衣鳥不驚何日江干
瞻棨戟依依寒夢逐行程

恆

泰

字月帆號履安杭州駐防滿州鑲藍旗人道光乙未舉人官山西知府

浙江忠義錄恆泰於辛酉營城失陷自焚死妻關氏同殉

題瑤池宴圖

何處觴王母瑤池百尺臺神仙齊上壽帝子不凡才青擘麒麟
脯紅飛瑪瑙杯崑崙終古在八駿可重來

徐

鎬

字石樵仁和人道光乙未舉人官河南盧氏知縣

丁丙曰石樵工詞章以大挑發中州善治獄幸盧氏值
捻氛四起且偏邑城晝夜守備環攻不下攝輝縣汲縣
多所設施旋引疾乞身卜居百泉以耕以讀人不知其
宰官也厯主彰德輝縣書院多所汲引善學策書神似
東坡壽八十餘卒

老將

十載輪臺守封侯歸去遲騎驢全晚節射虎記當時心事征袍戀功名故劔知將軍如復拜依舊玉門馳

老僕

今果蒼頭矣辛勤歲月過青衫同輩少繡襖主人多足繭趨常蹶心盲問屢訛龍鍾好歸去無奈愛才何

朱元呂

字漁璜海甯人道光乙未舉人

家傳略漁璜幼穎悟甫成童入泮道光乙未獲弱冠耳癖好金石手自摹搨嘗至陝右歷岐陽漢中諸郡凡西省所有碑文石刻以及鍾鼎款識一時珍羅殆盡著有金石粹編補輯嘉定王少司空所未收或收而未見全文者均為補正儀徵相國金石志所未備者推而廣之更加確鑿蓋愈好而愈精也戚友急難為謀必忠視如己事其有客死他鄉者往往為之歸喪先以中書官內閣旋改知縣調選邁時疾卒年僅三十有六

老子經堂

在兩關旁

東來知老子尹喜早除庭望氣遙瞻紫驅牛恰過青遺編傳
道德信宿仰儀型回首函關在升堂尙拜經

俞敬佑

字慎之號簡庭海甯人道光乙未舉人

內自訟齋文鈔俞氏園寶善家傳末云敬佑從余游道其家素貧自咫園曾祖以下皆未葬咫園出數十年所積族葬於邑之袁溪許家橋叔祖萊園弟寶書附焉有同幕客死力爲經紀歸其櫬時皆稱爲長者簡庭與其兄敬佑同承家學文章品誼可以徵其世德焉矣

偕霞軒弟游湖上

滿湖寒翠落煙低衰柳平橋手共攜一帶白隄環水曲亂山
紅葉落霜齊雪泥又印新鴻爪沙草重尋舊馬蹏打飯僧歸
天欲暮橫斜人影夕陽西

王燮堂

字也農餘杭人道光乙未舉人官麗水教諭

許莊祥日也農先生性好善鄉里有義舉必勇爲遇災歉必多方集振以拯餓者道光甲辰大挑一等以親老

改就
教職

徑山懷古

好古搜奇興欲狂
徑山碑碣蘚痕蒼
出塵心定懷思邈
覽勝文雄構蔡襄
鎮國基湮遺敗瓦
含暉亭圯賸斜陽
四州路達猶堪認
飽看名山蠟屐忙

巍峩嶽峙更淵渟
鳳舞龍飛勢未停
禪座尙存三劒迹
輿圖未改五峰形
靈雞豕古雲時護
馴兔窗虛月尙扃
鳥道蠶叢疑蜀棧
偏安王氣獨鍾靈

左右峰高路本通
羊腸曲折列其中
蜿蜒半達苕溪北
繚繞長圍雪水東
地勢遠連舟枕麓
嶺形高對洞霄宮
游人莫說興亡事
南渡江山繫慨同

策杖登臨寄所思
何須山徑畏嶮崎
咒龍鉢古神何在
喝石

巖高勢更奇此地當年曾卓錫而今到處可尋詩興圖試檢
臨安志剝蘚捫苔笑我癡

章

溥字寶華號雲臺嘉興人道光乙未舉人著蘋花閣集

夏日圃居雜興

松寮鎮日界湘簾翻愛消炎樂事添熱客不來茶淪罷一聲
冷玉落犀匳

竹屋蕭森水檻涼日長散髮傲羲皇憑闌忽覺微風起吹過
一池紅藕香

讀詩三首

杜陵號詩聖萬古開鴻濛太白與昌黎鼎足壇坫雄宋元格
遞降日漸變唐風要皆出機杼宗派羞雷同後世事剽竊學
步慚雕蟲浮辭競瀾漫仄豔羅纖茸坐令詩學壞濫觴曷所

終疇能洗舊習健筆凌華嵩

作詩貴言情情摯不能已曷爲輕元白而痛斥溫李宣尼大
聖人刪詩存溱洧離騷繼三百蛾眉雜蘭芷從來兒女情實
關風化事叶香奩雖猥褻婉詞寓微旨緬懷荆公言見解棄
渣滓學杜臻藩籬斷取西崑體

詩律卽心聲字字見情素非心所欲言雖工乏真趣朽腐化
神奇邯鄲陋故步絢爛歸平淡琴瑟含太古叶腹中萬卷書
足底萬里路從此發爲詩或免刻舟誤

李文賁

字葵園嘉興人道光乙未
舉人著一丈紅薔屋詩

送西苑兄之通州

侵晨戒行裝薄暮非故鄉游子遠行役徘徊古道傍游雲鬱
平楚落日生蒼涼過雁在寥廓獨獸蹲高岡行行重行行四

顧心茫茫結侶送君去臨歧各斷腸況在昆與弟能無增慨
慷

長水何迢迢高山何蒼蒼山程復水程別意與短長飢驅良
非已百憂集中腸君看西陵外松柏鬱蒼茫相賞在歲寒豈
逐眾卉芳志士安義命窮餓固其常出門亦何爲所願匪易
償

徐槐廷

字雲鶴海鹽人道光乙未舉人官

王彬傳略先生立品端方以文章教後進多所成就年
五十餘始以大挑官粵東歷任地方誅劇盜清積案除
苛派恤獄囚初任鶴山卽有萬家生佛之號任開平時
有村民爲鄰縣誣陷新甯令將以兵臨之急爲白其冤
於大府事遂寢保全甚眾在韶州軍營三載鞠獄詳審
嘗有論事敢寬三尺法原情莫誦片言能之句歷充同
考所取多雋才順德梁耀樞南海譚宗浚先後成
一甲進士引疾歸里建宗祠立義田卒年七十五
有以苞苴進者余卻之或笑爲拙詩以謝之

不受人閒作孽錢古來詩句最堪傳未聞廉吏無終局試看
貪官得幾年爲政當思民社福居心敢望子孫賢同人莫漫
相非笑此念由來答上天

衙齋正對小崑崙山每朝啟牖翠色撲人夕陽西下則
又紫氣滿山矣終日倚窗宛如讀畫

生平最愛山而無遊山福南北久奔馳形神多局促況今宰
官身日夜勞案牘偶談山水佳悔向風塵逐何期衙齋中無
異居空谷崑崙小名山推窗悅我目晨光尙熹微空翠如新
沐夕陽忽西頽青紫成繁縟陰晴現百般春夏盈累幅雖止
聳一巒千山萬山足終日恣憑眺庶免陟林麓對此開我樽
嵐光淨可掬

歸田

光陰彈指古稀年去住無心任自然容我山中延歲月閱人
世事盡雲煙宦途況味真如蠟田舍風光別有天最是江南

三月好一帆穩度鬱林船

黃燮清

榜名憲清字韻南海鹽人道光乙未舉人官湖北松滋知縣著倚晴樓詩集詩餘樂府七種

實錄

府志燮清充富館膳錄用湖北知縣病不之官自是怡情山水著述益

晴樓繼又得硯園為楊晚研太史別業改葺晴雲閣為倚
知交鵬詠其閒有終焉之志咸豐辛酉賊陷縣城乃聞
關之楚就捕不獲為文牒神虎遂滅夏旱又以文禱翼日
有虎患調任松滋有政聲未幾卒著有詞綜續編廿四卷
王慶勳曰韻甫穎敏絕人才思秀麗所撰樂府諸詞曲
流傳人口幾欲接武前賢詩格尤不名一家隨物賦形
不能測其筆端之造化才氣所鍾擬以尤悔庵諸公不為過也

將進酒

琉璃杯勺金叵羅鷓鴣留客春風和落花游絲易晚晚有酒

不飲成蹉跎東家女兒雙翠蛾昔何窈窕今婆娑
俱白首明鏡安能別妍醜玉顏如花不常好底用閒愁損懷
抱劉伶鍤步兵廚鼓趙瑟吹齊竽美人贈我雙玉壺酒酣擊
節歌嗚嗚犀首無事但須醉君不見三閭獨醒傷顛顛

服食求神仙神仙遠在三山巔徐郎樓船去未返祖龍已老
沙邱邊我來滄海上但見海水搖青天雲中麻姑鬢成雪鰲
骨飛霜照明月東方小兒爾何人遊戲卻得長生訣飛廉桂
館空瓊瓏茂陵石馬嘶秋風冥心好道苦寂寞曠蕩無如酒

中樂

束髮事游俠結客千黃金金盡不足惜但願爾我同一心人
生聚散見交態田常失職客何在豔陽桃李敷春華澁澁雙
燕飛啄花文梁畫棟有變易明年花發來誰家田實車馬互

冷熱罵座空勞灌夫舌吁嗟肝膽誰堪同酒酣卻看青芙蓉

織錦詞

爐薰複帳湘煙碧星戶垂簾桂花白萬緒秋心析亂絲瓊梭
宛轉愁難擲香篝倚壁珍珠明桐子落檐成雨聲起視銀河
忽見月月色盪漾關山情涼蛩警枕鴛鴦瘦好夢浮沈玉壺
漏一夜嘔紅上錦機明朝顚顚相思豆

畫鷹

素壁颯寒氣蕭蕭枯樹風大荒秋鬱勃平野月沈雄肅殺乘
金令精神出化工兔狐猶未盡孤負羽毛豐

韜光晚眺

秋色來蒼莽西風一倚闌雲歸諸嶂暝日落大荒寒古洞聞
猿嘯晴空見鶚盤神仙儻招手乞與碧霞丹

搗衣曲

搗衣明月夜夜靜響何悲之子遠行役歲暮未旋歸秋風起
叢薄鴻雁東南飛念君身上寒不忍處重帷布帛雖適用物
賤或見遺安得心頭血化爲機上絲婉轉織羅綺纏綿爲君
衣復恐春日暝中道還分離離合在君意妾心焉得知

俠客行

白馬銀鞍紫錦絛少年結客五陵豪歌樓月上紅鐙炮醉擁
胡姬看寶刀

題福王夜燕圖

夢裏揚州入戰場秦淮煙月正飛觴外廷畫輦徵歌舞中禁
詞臣作棟梁金粉餘香天酩酊風雲殘局帝郎當酒痕王氣
同消滅一曲春鐙總斷腸

傾脂河曲

河中之水珊瑚冷河上妝臺猶倒影煙波一鏡膩成雲隔岸
桃花紅不醒憶昔夷光聘若耶臨流顧影豔如花珠簾滴粉
成酥雨鈿閣凝香暈落霞河光曾照傾城面一去五湖春不
見天涯多少浣紗人可惜蓬門顏色賤流水盈盈日向東綺
羅荒盡鳥嘯風赤闌干朽無人倚時有閒鷗問落紅

岳倦翁銅爵歌

鄂王盡忠倦翁老尊酒淒涼奠斜照此爵千年神所憑青銅
剝蝕常光耀五國城中歸信絕胡天黯淡餐冰雪惟王忠憤
冠諸軍渴來誓飲羌奴血擬補金甌盡赤心誰知銅箸謀長
舌生不能飲黃龍府有酒惟澆墳上土空山石馬怒嘶風古
井銀瓶寒咽雨敦槃金帛早和戎鐘鼎勦勞勦對簿荊棘銅

駝泣故宮佞臣鑄鐵嗟何補一勾寒泉賦大招西湖山色淒
尊俎吁嗟平鑑曲冬青蔭寂寥天陰月黑鬼神朝諸陵麥飯
無人祭攜榼年年過段橋

丹陽道中

飛鳥送桅檣煙帆赴渺茫孤城倚流水一塔表斜陽高岸有
山意遠林如畫蒼春風最濃賴容易綠垂楊

暮春集小有餘芳感念舊遊并懷亡友許金橋

煙草滿地春綠肥惠風冉冉吹我衣燕臺三月芳事盛落花
胡蝶隨人飛尺五莊前新柳細海棠紅到花之寺繡轂爭尋
賣酒家香塵暗逐連錢騎對花命酌朱顏酡雛鶯乳燕宛轉
歌中年絲竹哀樂多我心善感非由他酒闌忽憶前遊侶萍
水飄零幾人聚論交千里應風雲彈指三年惜時序

丙申暮春同孔

繡山秦澹如潘惺齋絃庭昆季梅伯言張亨甫陳迹轉瞬尤
姚梅伯高已生諸君讎集於此今聚散各半
可悲許渾已趁天風歸平生愛我入骨髓子今長別知我誰
昔年聯轡常遊此今我重來君已矣欲傾杯酒奠郊原惆悵
詩魂呼不起噫吁噉聚散恩恩劇愴神暗將熱淚灑歡辰不
知明歲看花會此地重遊更幾人

馬頭孃神絃曲

棟花庭院春陰悄殘夢沈沈月初曉戴勝桑田拂羽來羅敷
柘館臨妝早陽春三月正和融蠶信吹來約畧同何處催花
初擊鼓誰家采葉乍提籠中婦長眉山壓翠小姑脂澤天然
媚紅裙掩映拜風前以酒樂神使神醉神醉我酒神喜歡使
我力健蠶平安神醉我酒神歡喜使我買桑賤於薺願神賜
繭滿筐筐使我黼黻娛君王願神賜繭滿箱簪使我衣裳煥

姑舅我有新詞爲神譜我有靈絃爲神鼓神之來兮茶蘼雨
流鶯爲歌燕爲舞神之去兮櫻桃風酒顏欲與花爭紅願神
常醉蠶常好挾纊家家春不老

題楊龍友畫扇

一冊煙雲墨未殘板橋流水碧雲寒南都王氣銷磨盡留得
青山畫裏看

陳山登高

九月九日霜天空落葉如雨蕭蕭風好山歷劫幸無恙曳屐
直上青芙蓉前年戰火逼海澨龍湫一勺浮鴻蒙老魚吹浪
作人立鼓聲夜徹馮夷宮是時戰守頗有備指揮決勝須元
戎甲盾五千詎云少何爲散落成沙蟲壤雲頽壁土氣墨樓
船一炬青山紅萬室流離走相避哭聲上達聞蒼穹卽今兵

火已消歇人煙漸密秋禾豐安不忘危古所戒智士識遠毋
苟同道謀紛紛議善後空壁亂疊層雲中王公設險制中外
匪直壯觀高垣墉糜金百萬豈得已孰敢矯誣貪天功亂離
如夢忍追憶中野尙有哀號鴻鴈體滿地戰血紫如見燐火
燒丹楓登高茫茫集百感帝座呼吸何由通側身東望獨搔
首海月卻掛扶桑弓

吳鐵琴州守以所藏孫登鐵琴見示予爲上絃并誌以
詩

躍出麤賓鐵曾經劫火來千年神鬼護萬壑雨風哀天籟沈

高閣

琴爲項氏天籟閣所藏
閣燬於火而琴獨存

秋聲落嘯臺廣陵今絕響孤負

此良材

甯王耶

寒濤細雨接天陰莽莽風雲變古今大壑魚龍猶戰氣故宮
鸞鶴自悲吟分封難襲三王制據險終生七國心燕啄王孫
原祖法英雄時命有升沈

澄塘海忠介題壁

忠介令興國時省敘至澄塘憩諸生
王應時家題詩於壁字大如盤瘦硬

有生氣今猶
存王氏宗祠

諫書凜烈風霜字情話流連父老觴九死餘生終倔強一官
小受亦循良觸邪爭避神羊角擲筆猶騰臥虎芒五十六言
遊戲墨空山留鎮重甘棠

木客吟

停君白玉琴聽我木客吟木客自言秦至今當時咸陽恣荒
宴四海徵材起宮殿民力凋殘地力窮鞭撻山靈沉愚賤木
客採木上洛山不得大木無生還自分此身委豺虎豈知服

食能長顏徐福樓船渺滄海秦皇不仙木客在木客晝侶廡
與慶夜則猱與猿山魃野魅相伯仲非神非鬼非神仙不知
有漢況魏晉山無甲子忘其年晝遊盤古峯夜攀女媧石直
視下界雲茫茫萬里鄉關秦月白月色不照歌舞臺照見長
城鬼磷碧城下髑髏生齒牙山之人兮歸無家武陵或有舊
相識春風無路尋桃花噫吁嚱三十六宮盡塵土十二金人
淚如雨客何爲者竟千古獨醉孤吟意良苦曷不乘煙訪毛
女千載荒涼結儔侶同是嬴秦流落人未識相逢作何語

義竹林弔萬大司馬

元吉

王氣銷沈玉樹歌南天猶挽魯陽戈江淮四鎮同心少滇廣
諸軍解體多窮海魚龍悲折戟故山鸞鳳想鳴珂琅玕定化
珊瑚紫上有忠臣淚不磨

燕湖舟次

吳楚風雲鬱大荒東南砥柱屹中央
潮驅白馬來湓浦山走蒼龍下建康
討賊旌旗思庾亮雅歌絃索憶周郎
江關無限登臨感暮雨蕭蕭鼓角涼

災民歎

自兖州至王營聞見所及怛然於懷書之以俟司牧者覽焉

客從兖州來野殍紛相屬徐泗更蕭條
道路不忍目白骨浩縱橫零殘手與足
邨荒狗彘飢餓尾食人肉嗟爾何貪饕
爾非民不畜民飢不爾食民死飽爾腹
膏血飼爪牙反噬抑何毒爲我語狗彘
爾毋縱殘酷民瘠難更甦爾肥豈能獨
食盡欲何依早晚同溝瀆

阿弟猶襁抱阿兄四五齡阿弟飢已死
阿兄匍匐行狗來食弟肉還復視阿兄
明知與鬼伍見慣亦不驚哀爾固人子
生

雨浙輶軒續錄

卷三十五

黃變清

器

八
文
文

死兩伶俜飢寒父母棄軀命螻蟻輕吁嗟紕綌兒黎棗方紛
爭

驅車嶧陽道邨寒少人煙老穉什伯羣雜逕擁馬前見客相
叫號宛轉乞一錢得錢豈救死殘喘冀苟延襁褓誰家婦長
跪官道邊手指所生兒願隨耶執鞭割愛詎不痛良勝墮九
泉呼兒坐轅上瑟縮吁可憐阿母顧兒喜謂免溝壑填兒往
幸溫飽我生旦夕閒亦知死離別撒手翻欣然羣兒不得偕
躑躅思追攀路長哭聲遠悲風與迴旋

濺濺順河流娟娟河上女哀哀向我嘯絲絲淚如雨自言良
家子嬌小守房戶低徊阿母旁未識飢寒苦自從黃河災有
田不種黍阿母老更病三日火未舉骸骨滿郊原兒死何足
數一死固尋常誰來飼阿母聞言心骨悲未忍呼蹴與解囊

供一餐旦夕竟何補

龍山高

龍山高高皖江碧
樅陽老蛟忽生翼
飛來城頭攫人食
月暈重圍走霹靂
城中達官誰最賢
蔣欽忠孝能兩全
謂蔣蔚亭中丞文慶
陳陶一敗賊蔓延
故人房琯吁可憐
男兒沙場期報主
鋒刃餘生翻對簿
早知後臂不封侯
悔不殘年終射虎

擬諸將

赤眉青犢敢操戈
手詔重徵老伏波
符節自天頒虎豹
旌旗臨海走黿鼉
武侯臥病緣憂國
宗澤傷心未渡河
馬革忠魂招不得
五谿淫毒至今多

相公使節忽登壇
敕賜神刀北斗寒
斧鉞未伸司馬法
貂蟬空壯惠文冠
百蠻地險懸軍苦
五嶺天高轉饑難
了了山川

形勢在談兵恰向畫圖看

書生裘帶鎮南瀛絕島窮洋識姓名五等酬庸新拜爵兩朝
專閫舊知兵蠻夷早納包茅貢吳楚方驚細柳營百勝餘威
應破竹可憐未過岳陽城

傳聞陸抗在東吳衣帶長江未可圖自信兵威雄北府誰知
天險失南都上流扼要空屏障下水連牆走舳艫舉目新亭
風景異殞身能報國恩無

通侯家世老元戎九死餘生氣尙雄李廣殺降宜落籍孟明
棄罪再論功援軍未扼潯陽口捷報頻來淮水東騎鶴揚州
何日到瓊花落盡戰場風

烏鴟旗纛下蠻荆江左夷吾在此行七省材官歸特將三年
士女倚長城然犀應見龍蛇走帶甲微聞蟣蝨生苦爲東南

支一柱誓將肝膽奉承明

李日熾

字鶴杉桐鄉人道光乙未舉人
官衢州教授著竹素山房集

縣志曰熾生有異姿性能強記雖至暮年猶能背
誦經書光緒丁丑與同邑沈生德溥重游泮水
冷廬雜識鶴杉博聞強識才藻富有曾以長鬚呼餘皇
賦受知於學使李芝齡師稱李長鬚鄉薦入都得詩盈
篋編為北行草

贈端木鶴田舍人

歲星遊戲住人閒車馬盈門自閉關一架藤花留散吏

舍人寓寄

園紫藤十年被省話清班海隅應

詔恩原渥日下讐書老未閒料得韋編三絕後

舍人著易等
指已刊

身事業付名山

八十重游泮水徵詩

地轉風輪不暫停子衿重與賦青青鸞旂煥彩年周甲鼉鼓

傳聲歲遇丁空有丹心思報

國漫誇皓首解窮經觀光二老婆娑甚落落餘暉曙後星沈謂

伯淵譜兄同案長子一歲

屠繼善

字性涵號萊士鄞人道光乙未舉人

縣志繼善篤親信友家素封後已中落而三黨振恤月給勿衰族節婦某氏稔其貧辭之繼善終勿輟也有司欲舉孝廉方正繼善以母老辭或勸為捧檄計繼善曰念名實而濫邀名器其將以罔上者辱親乎卒力辭之董沛曰先生為先伯母之姪秉性峻潔不習時趨

題嶺梅七度圖為馬銘軒先生作

梅嶺頻年記宦游一官一集唱還酬而今移種桑麻徑付與

兒童竹馬謳

鋤月庭前夜有聲閒聽老鶴和雞鳴酸鹹世味都忘卻清白

傳家飽菜羹

呂燮煌

號又村嶧人道光乙未舉人官臨安教諭

縣志燮煌性穎悟九齡時侍師夜坐口占月上山頭靜

風來水面涼句師奇之比長以詩古文雄於時事親以

孝聞於人無少長煦煦親愛未嘗立崖岸義所當為又

周人之急常若不及任臨安教諭甚得士心方倡葺

文廟未及卒事疾歿於署士林悲之

呂岳孫曰從叔祖多才好學名震一時道咸間吾邑邢

愚庵先生佳晚以古文名錢蘇門先生璽可山先生銘

以詩名先生兼之

翔鸞館

一邱抱一壑一山環一林窈窕古仙館遺構蒼崖陰頽垣薜

蘿擁畫壁苔紋侵疊石留仙蹤餐霞清道心羽化不復返鸞

鶴空遺音

山月行

微颺瑟瑟生庭柯簾前花影搖婆娑舉帷起步覺衣薄當頭

皓魄揚金波落落疏星兩三箇欲滅不滅天無河對此令人
動長歎美人遙隔山之阿芙蓉花發秋水多丹厓翠嶂深煙
蘿後飛鷺鶴前鴛鴦征鴻消息長蹉跎舉杯屬月歌吳歌月
光飛落金叵羅

歸興

下澤車安在空思馬少游一鐙寒破夢萬木健鳴秋肺腑尊
前改頭顱鏡裏愁日歸今已晚況復久淹留

平皋官署

雨後園林霽色開片雲還自傍城隈酒瓢詩卷關心嶽色
河光入眼來采藥空傳炎帝淵神農采藥到此城有神農淵遺迹看花時上
號公臺號公臺在平皋城西一名賀酒臺天涯此日留鴻爪風雪何堪歲暮

催

文雅臺弔古

鄒枚意氣吐長虹
文字爭傳舊日工
芳草卻連梁苑綠
夕陽猶似漢時紅
池中孤影鳬還在
洲上千年鶴已空
帝子風流誰與繼
徒教憑弔月明中

陳毓秀

字迪光號芝生補江人道光乙未舉人著左溪山房詩鈔

家傳畧毓秀少失恃育於祖母王曲盡孝道幼穎悟屬文操筆立就三上公車不售座師翁文端慰留之卒以親老辭歸遂不復出所著尚有享帚集竹葉山房詩文鈔均燬於火

京口渡江

巴蜀雪初消
東風一席招
濤聲喧日夜
地勢控金焦
滄海歸墟闊
魚龍跋浪驕
平生濟川志
帶水未云遙

渡黃河

平沙浩無際
兩岸屹於城
勢挾徐邳走
流兼淮泗橫
丸泥將

隙補尺地與天爭欲問乘槎客桃花春浪生

綠楊步

春風一道綠楊隄紅雨初晴鶯亂嘯最是光陰三月暮夕陽飛絮畫橋西

王吉人

字雲樵甯海人道光乙未順天舉人陝西

呂雙煌序畧雲樵敦行卓識與之道古及時事所見高卓雅重交遊不設匡岸淵涵玉粹知今知古非近流可幾也

徐樹銘序畧先生瓊材瞻智經史羣籍靡不窺覽以名孝廉出宰關西入秦五日引疾乞身或以問先生笑而不答蓋當時俗競豪強人爭侈倚念身之不可汙道之不可枉誠不如其已也歸田無以自給嘗遊齊豫佐理記室所為詩浸淫漢魏旁薄風騷洵能兼百家之長而頗諸史之蘊矣

大明寶鈔歌

高皇立國金甌堅欲使賦幣如流泉貨刀契刀不師古轉以

一紙當官錢中有農印之絢爛旁有蟠龍之蜿蜒枯桑剝皮
製極樸芝泥墨瀋蒸雲煙大書特書抵一貫僞造者斬辭牽
連我聞洪武之八年詔立鈔法頒九邊百萬青蚨化爲數寸
紙黃金入手嗟空拳孝陵作事大狡獪令守錢虜徒垂涎先
生獲此喜創見徵詩當代紛投牋或云制度近苟且或云救
時有微權我欲置喙於其間摩挲醉眼翻茫然由來萬物貴
適用利用已過斯棄捐鈔不飛灰果何幸仗文士與長流傳
藏以祕笈同瑤編燦以墨花雲錦鮮洗銅臭結翰墨緣鈔乎
鈔乎應自憐

銚期樹

小劉山頂絕憑藉有老棟樹產石罅盤根錯節森三冬吐萼
含葩盛初夏問誰手植枝離奇云是安成日閒暇閱二千年

兵燹餘四圍喬木盡彫謝此棟歸然巖壑閒撐住乾坤力汝
借青蒼古色淩檜杉匝匝層陰失桑柘徠松甫柏真同儕病
橘枯櫻豈流亞斧斤偶或來樵蘇輒聞鬼物怒叱咤我欲往
觀無清閒聊作小詩寄嗟訝詩成俯仰懷雲臺嶽嶽戰功孰
方駕

洛陽細民歌

洛陽細民許天錫居家僅有四立壁子身養母竭子力母年
九十已七十日往古井代人汲得錢寸許走市集輒買餅餌
及肉腊歸勸母餐侍母側少焉提綆出復入但恐慈顏有飢
色豈識愁腸無一粒傷哉貧也淚霑臆斗升微祿不可得竊
才敢效逐什一呼天負負長太息以此終身報罔極

二丐行

陳老醜姚犇牛兩人行徑翳桑儔鵠衣百結不蔽體蒙袂輯
屨行街頭日覓殘羹與冷炙終年枵腹仍黔婁窮民無告乃
至此撫身自厭如贅疣忽遇黃金棄道左老醜得之竟日守
途人聚觀聲嘈嘈僉曰此財宜汝有聞言瞠目看蒼天兀坐
無辭拍兩手須臾失者呼蒼黃大笑擲還反身走犇牛至性
何纏綿孜孜奉母思承歡口啖糠粃足重繭朱門匍匐求肥
鮮盤飧一鑊獲珍味中懷喜躍猶登仙忍飢疾走轉茅屋折
取匕箸怡親顏衰親顧子善戲謔生兒何必能求田老人頓
頓飽梁肉彼富家婦難復難陳丐偃蹇義必赴姚丐奇窮識
烏哺人心不死天心憐藉藉聲稱播道路丐乎丐乎今安歸
縱爲執鞭亦欣慕

復讐行

王澤九生在襁褓父被王賓殺諸道長官強斷償以財賁渠
一死甚草草乃祖揮淚收金同呼婦曰攜汝夫來婦驚起視
見白鏹淚痕如縷心如灰此誠吾夫命所易忍作盤飧飽家
室幸有塊肉遺呱呱請翁瘞埋待異日澤九旣長聞母言怒
髮上指掀義冠恐機不密害成事謬與賓暱酣杯盤旁人訕
笑詫奇怪賓亦哂其釋芥蒂幕地席天方歡呼突然扶醉出
郊外寶刀三尺寒秋霜叱賊快將爺命償刀落長虹血四迸
天爲含笑馳電光束身歸獄死無怨赦書飛下免投竄二十
七年冤始伸祖衰母老尙及見

榮小兒歌

榮小兒聾且癡乞食養母忘勞疲母食則喜否則泣血誠至
性何淋漓鄭莊矢誓不相見溫嶠絕裾甘遠離天生若輩非

曹倉一蠹魚

光武廟行

蠅聲紫色稽天誅白水真人思馳驅昆陽一戰盡股栗坐見
卯金膺赤符何物王郎罔顧忌稱成帝子竊帝位十萬戶購
蕭王頭滹沱冰合有天意邯鄲已破盆子平赤眉青犢俱銷
聲司隸衣冠久快覩遂還故業開東京長安西幸謁高廟豁
達謹厚兩焜耀伯叔固是人中豪比郤陽侯乃非笑我昔讀
史欽英風今來古苑瞻新宮雲臺諸將悉陪祀鬚眉颯爽何
瑰雄晚歲厭兵恐自病甘露醴泉集休應不教太史書禎祥
如何受命信圖讖

伏生授經圖

丸丸古柏森蚪枝芭蕉茂密清陰垂中有一人據皋比霜顚

雪鬢飄鬚眉憑烏皮几顏怡怡手玉麈尾如指揮身後有女
遙瞻窺坐隱雲根天人姿一童子捧書未披石上鵠立嫻幼
儀稍前屏列松支離一人危坐拈毛錐幅巾據案鋪赫蹏懸
鍼走腕忘勞疲復有二人兵仗齎逍遙樹外閒支頤儼相告
語聞噫嘻當年勝事能直追衣冠樸古林泉奇神情宛肖神
采飛寫生妙詣何淋漓焚香展卷深人思圖修七寸壺頭齊
橫寬二尺新裝池作者汝清名留題摹道子筆深天機圖後
署云
晉人魏汝清
臨道子筆精研略不差豪釐明張少保儀前徽張延
登倩工
雕刻傾巨資摩挲愛玩同鼎彝意在久久傳緇帷我聞名手
唐王維亦有此圖珍當時但少兵使相追隨其餘位置皆依
稀竭來鄒國瞻芳祠得從石本欽容輝願將古墨研隄麋璫
椎響榻區瘞肥新交夙好紛贈貽使後生等尊經師講求治

術囊

垂衣盡洗甲兵消鼓聲長令六合游軒義

次韻答徐壽蘅學使登玉照樓看雪作

重衾壓夢喚不起起來飛雪花漫漫登樓吟歎豁雙目明湖
積水激微瀾雲容煙態浩無際但覺天地生清寒側徑徧鋪
白罽毯修林頓裹青琅玕左聳瑤臺右銀闕仙家異境何多
般星使詩興來毫端臨風白戰增大觀歛然擲筆不快意故
園回首興長歎湘山浮玉明重巒湘江沈壁消驚湍會見陽
和散堙鬱華胥懷葛同閒寬

馮貞祐

字騰甫號筠芬慈谿人
道光乙未順天舉人

丹陽夜雨懷余田兄

寒雨雲陽夜泊船孤燈自照不成眠兼旬斷酒緣多病獨坐

兩浙輶軒續錄

卷三五

馮貞祐文 慶張鳳翼

書

又又又

吟詩且學禪壯日功名淹歲月故人旌旆渺山川崆峒西去
流沙道應記江南望眼穿

文

慶

字元圃杭州駐防滿洲正黃旗人諸生

城西古蹟考元圃寓義方巷喜讀好吟詠深於國書之學

得月亭

莫羨月先得斯亭近水開花濃幾回醉日落好風來執扇延
秋爽筠簾無點埃素心人不至坐損釣磯苔

張鳳翼

字韻珊海甯諸生

許莊祥曰韻珊為北湖先生後人持躬謹飭治家以勤儉為宗布衣蔬食無墜家風

花嶼

一徑藤蘿亦可梯居然小築近幽棲鍊餘羽客一拳石俯認
騷人雙屐泥絕壁殘紅依澗落前山寒翠壓檐低平林近景

羣鴉噪歸路應無咫尺迷

王力田

字乃秋富陽歲貢官景甯訓導著味真味齋詩集

祁世長傳略余視學兩浙案試括蒼聞士人曰前此十年有學官富春王先生乃秋經明行修士多聞風興起焉余心識之越半載試嘉禾有秀水學官王君鑲字湘匡者出其先集求序知乃秋先生即湘匡之尊人集中諸作奄有晚唐遺韻

哀富春

蠡旗搖曳江城曲城下民居作兵屋十家九徙巷爲空半夜

長街聞鬼哭寒沙滾滾陣雲開鎮帥登陴誓眾來

時劉鎮臺芳貴駐兵

嬰守節制森嚴人重之稱爲小劉君

四野煙塵戰方劇鼓聲急喧如雷戰罷

枕戈天薄暮詰朝相見士猶怒要其疾風掃箄完那知大雨

傾盆注神愁人怨礮不然逆氛四合蟻轉旋將軍裹瘡空碧

血小劉君被創甚殉節富陽

壯士飲恨半黃泉禽奔獸竄苦無主飛入噬

人千猛虎邑小難支三日糧可憐一炬盡焦土從今莫唱念
家山家在棘荆瓦礫閒我與江潮共嗚咽寂寞朝來空夜還

憫農詞

我本識字農深悉田家苦況經離亂年舊壤多荒土勸甿村
無人占租地無主今春劫又生江南急輦鼓括悍作賊餐丁
壯遭賊虜鏹銓暨糧粗盡付賊一炬寇退疫交侵齒豁草同
腐落落墟里閒遺黎堪指數裏瘡集流亡扶病招亞旅力耕
俗類夷火種法仿古大吏督師來移文屬所部痛民重糶空
散穀給貧戶縱難資饗飡敢不藝禾黍無奈兵燹餘畝十未
得五更憐秧乍分亢旱復無雨何來龍骨車竭澤水頻取空
空束手觀惻惻哀音吐揮淚禱碧翁還望德施普流膏活閭
閻洗甲化干羽早釋

聖人憂輸將供

天庾

白帽謠

君不見精選勇士破勅敵梁主舊傳落雁都又不聞團結鄉
兵禦強寇南宋亦有毛葫蘆約束貴嚴心貴壹飛芻輓粟資
糧給制勝無過自守堅衝鋒要在乘其隙小邑村居尙劫灰
瘡痍未復飢寒催犀渠鶴膝久無備底事喧傳白帽來揚旗
謂出包仙意時諸賢包村有名立生暗佩靈符作護庇因敵
爲糧軍餉多陣前礮火無須避此言無乃皆虛聲烏合難教
隊伍明遇覆先奔後無救危巢重破師何名我爲義民抒一
策安排戎器且堅壁密結聲威助大軍多多附上軍功籍

朱時謙

字銀沙嘉善人
著靜濤齋詩草

沈嘉樾序略銀沙具夙慧髫年即喜涉獵書史性耽吟詠輒與賓朋唱和為樂

登柳中長水塔

一上浮圖眼界寬潮來捲倒雪千盤搖天星斗秋風壯踏浪
龍鼉海氣寒月湧龍潭當檻入雲橫鳳嶺倚闌看鱸魚風味
江鄉足準擬灘頭把釣竿

吳鳳徵

字我山石門人諸生著西江集

野店

布帆落處近黃昏渡口人家半掩門絡繹葦航初散市縱橫
茅屋自成村貪嘗野味盤飧雜細問行蹤笑語溫牆角一痕
新月上披襟快對酒盈樽

馮全均

字筠竹號少蓮慈谿廩生

登吳山

濤聲飛過大觀臺一片歸帆逐浪開日暮西風秋色裏半江蘆荻雁初來

杜葆恬

宇漱吾號悔隅山陰諸生著晚菰園詩集

陶潛宣曰山陰杜氏世以詩名尺莊禾子兩先生重結鷗社鼓吹越風悔隅先生其猶子也爲諸生有聲再試不遇棄舉業習名法家言客游江右屢屐寇亂詩稿多佚僅存晚菰園詩一卷清而不枯麗而有則格高韻遠一掃卑緩哇俗之音

夏夜度大庾嶺

停杯延暝色出郭帶殘暑徑度榕陰風衣溼豆花雨曖曖村煙稀漸漸山月吐樹影辨明晦谷響迷聽覩高低循芳塍屈曲歷枉渚犬吠迎遠鏡螢閃隔深隄步憩紅梅驛月色方亭午主人盛供張廉從列三五茗醞次第陳肴馔更迭數餘醒猶未解漱齒徹華俎體涼行彌健餐飽力愈努上嶺驚棲鶴

飛噪散仍聚苔梯勞登頓跼足緩布武摩挲衣鉢石深宵參
六祖停輿感廢興寺角雲封古曲磴蟠修蛇危石踞猛虎崇
關開誅蕩時平免重阻回睇嫦娥嶂殘月隱海嶼雞鳴墟落
閒辨色趨浦澈含風葛衣輭浥露荷蕊渭村吐愛稻香未曉
先啟戶望望驛使門已報郡樓鼓勝情濟昕宵清風入肝腑
惜無南枝花歸夢儻可補

許灣晚泊二首

落日迷遠近舟行隨去鴉江聲下楓葉暝色入蘆花郡縣頻
年寇關山何處家前津戍鼓動棲泊奈天涯

偶來山水窟帆倦且句留微月遲村澹峭寒生舵樓征衫感
戎馬官燭夢江鷗欲訪麻沙本兵荒那易求

盱江舟次贈蔡師竹龔鳳山

峭帆江上酒初停
敲枕蓬窗總忘形
林影遠涵霜氣白
山容晴露石痕青
從軍幕府依王儉
攬勝仙都識蔡經
藉甚翩翩阮書記
暮寒詩思入秋冥

鳳山將返灌城口占二絕爲他日奉訪之券

殘年風景話離痕
蠟燭初銷酒尙溫
他日囊琴相訪地
綠陰如水不開門

青山不礙女牆遮
啜茗風前屐響賒
怪底吟魂太清寂
昨宵籬落夢梅花

題常雲生茂才嶺外詩鈔

昨夢海天外
恣遊騎白龍
長空一千里
亂插碧芙蓉
樓閣仙蹤閱
波濤蜃氣重
醒披常尉句
靈境恍相逢

題張仲甫舍人應昌錄壽軒詩

哀樂中年事慢論故山晚怯陣雲屯江關詞賦追騷響客邸
驚花殢夢痕偶語性情思骨肉得傳著述勝兒孫報公近概
公應羨秋爽愚樓數舉樽

馬知良

字敬渠會稽附貢官烏程訓導

校官詩錄君好讀書年六十援例得官子詢其意笑曰此秀才滋味也壯游四方風塵僕僕卒不廢學

曉發苕溪

孤舟攜老僕秋至病還侵書劍蕭騷意關山感慨心回頭天
易老過眼日初沈獨有高堂隔宵飛夢不禁

鄭樹檉

字雲林號一峯餘姚增生著遊燕詩草

胡德輝曰先生穎悟絕人既長文名重一鄉省試不得志遂援例得通判職未及任而卒
古賢詠自昔國事多艱將帥攸賴任安危之寄須文武之才唐宋以遠代有英哲舉其尤著以志景仰

李鄴侯泌

賦棋擅幼聰早徵公輔器三朝友帝王中興業攸濟百口保
儲君兩策制虜騎辟穀效子房名哲夫何媿

李太尉德裕

中唐尙姑息河朔不可復匡時趙國公勝算操鈞軸三鎮殲
渠魁萬里遵約束朋黨惜難平功成竟見逐

寇萊公準

勁敵逼澶淵眾議遷都避止駕勸親征一壯中原氣飲博如
平時談笑卻虜騎當時無寇公已作靖康世

李少保綱

浪子稱宰相議和敢議戰右丞纔受命旌旗色一變敵騎宵
遁逃遮擊勢良便黜賢謝金人甘心棄梁汴

虞丞相允文

犒師有儒生督戰驅散卒平沈八百舟完顏氣爲奪半壁奠
金甌數世絕侵軼媿死劉將軍何必更問疾

于少保謙

土木喪全師盈廷但聚哭司馬奮壯猷強寇甘屈服奪門萃
羣姦元功膺顯戮所以南宋臣不願徽欽復

張之杰

字古愚號小陶諸暨貢生
著學福齋詩鈔接錦集

郭肇曰小陶性好遊嘗北走燕趙出長城度盧龍南涉
三楚歷瀟湘雲夢往返萬餘里唱和皆一時知名士

送周七蔥若楊二晴川至嶺南

二妙翩然出茲遊洵壯哉攜將江上月去看嶺頭梅銅柱青
天遠明珠合浦來到時懷古處清嘯越王臺

酈依仁

字伊人號梅
生諸暨廩生

郭肇曰梅生詩才清麗斷句如落葉云半艇斜陽收破
粥一牀涼月怨清砧讀史云市曹戲虎飢鷹出諫院寒

蟬噤犬多登龍山云草枯羸馬分羣
出松老飢鷹逐隊飛皆俊逸可誦

旅思

市月羈棲夢轉孤客愁如水正難扶餘花晚筍蕭公寺細雨
斜風賀鑑湖極脆鮳魚新入饌如錢蔬菜合提壺他鄉風景
遊人慣浩蕩鷗波尺素書

思遊五洩不果

春遊悔不待張華

鹽江先生

同向招提試越茶昨夢鬱孤山下過

成羣猿狖剝秋花

樓作繩

字永延號春堂諸暨人著夢花館吟草

古冢

青山嘯徧杜鵑聲一片殘碑墓道橫寒食無人奠杯酒梨花
細雨過清明

兩浙輶軒續錄

卷三十五

樓作繩周慶樞

卒

川上二

周慶樞

字幼漁瑞安廩生
著校祕樓詩稿

送別

蒼蒼夜色涼月落天欲曙送子一片心挂在綠楊樹長風萬
里來送入湖心去流水去不還並立弄珠露蘋香入畫船知
是來時路南浦草離離美人歸何處東西無定所宛轉風中
絮贈言金錯刀千載永相慕

春日遊寶香寺

一枝古塔矗江湄列岫彎環擁翠眉滿院鈴聲僧入定東風
吹老海棠枝

秋夜懷楊心蓮

旅雁幾時到秋風一夕生夢長憎夜短霜重覺裘輕壯志懷
長劒吟情寄短檠相思殊不已落月大江橫

兩浙輶軒續錄卷三十五

兩浙輶軒續錄

卷三十五

空